

# ELEMBO YA MITANO



Tógumba mitó sikawa mpo na libondeli.

<sup>2</sup> Tata na Ngolu na Likoló, Nzambe na-Nguya-Nyonso, Oyo asekwisaki Yesu Klisto longwa na bakufi, mpe atalisi biso Ye na mikolo ya nsuka oyo, na Nguya ya Molimo Mosanto, tozongisi matondi mpo na boyeneli na nguya oyo kouta ya Nzambe oyo akufaka te. Sikawa, Tata, tokómi pene na ngonga mosusu, ngonga oyo ekoki kobóngola esukeli ya Seko ya bato ebele.

<sup>3</sup> Mpe mpo na kopusana na likambo oyo, Nkolo, tozali na makoki yango te. Mpamba te, ekomami na Makomi ete: “Mwana-mpate azuaki Buku mpe afungolaki Bilembo.”

<sup>4</sup> E Mwana-mpate ya Nzambe, tobondeli ete Ópusana. Tobeledi na Yo, Nkolo, Mosikoli monene. Púsana mpe lakisa biso mwango na Yo ya lisiko, oyo ebómbámaki kati na mibu nyonso oyo, búkela biso Elembo ya Mitano oyo na mpokwa oyo, Tata, mpe mónisa biso oyo ebombami na nsé ya Elembo wana; mpo tókoka kozonga lokola Baklisto ya malamú koleka ndenge tozali sikawa, mpo tókoka komiléngela malamú koleka mpo na mosala oyo ezali liboso na biso. Tosengi yango na Nkombo na Yesu. Amen.

Bokoki kofanda.

<sup>5</sup> Mbote, baninga. Namoni oyo litomba monene ya kozala awa na mpokwa oyo, mpo na likambo monene oyo. Nayebi esika mosusu te, epai wapi nakóki komiyoka malamú, koleka kozala na mosala ya Mokonzi. Mpe sikawa koya na ndenge ya momesano te na malakisi oyo, wana tozali bobele kozela; soki Ye amonisi ngai Yango te, ngai mpe nakokoka kopesa bino Yango te. Nazoluka kosalela makanisi na ngai moko te, to eloko mosusu te; kaka ndenge Akopesa Yango. Ezali bongo. Mpe na—nandimisami ete soki nasaleli makanisi na ngai moko te, Yango ekoya ndenge Ezali koya. Mpe na bomoi na ngai mobimba, Etikálá kozala na libunga te. Ekozala mpe na libunga te mbala oyo.

<sup>6</sup> Sikawa, tozali mpenza, mpenza kaka kozongisa matondi na nkembo nyonso mpo na oyo Asili kosala mpo na biso, loboko monene ya kokamwa ya Nzambe na bomoi! Eloko nini ekoki kozala monene koleka, tokoki kozala na litomba ya monene boni, koleka kozala na liboso na biso Mokonzi na bankonzi, Nkolo na bankolo?

<sup>7</sup> Tolingaki ntango mosusu kobeta mpiólolo mpe—mpe kotombola babendéle, mpe kotanda ba—tapí mpe nyonso wana, mpo na Président ya ekólo áya na engumba oyo. Kasi, bókanisa naino, elingaki kozala mabe te, mpe elingaki kozala lokumu mpo na engumbo.

<sup>8</sup> Kasi bókánisa. Na mwa tabernacle na biso ya komikitisa, na mpokwa oyo, tobengisi Mokonzi na bakonzi, Nzambe. Kasi biso. . . Ye azali na mposa te ete tótanda ba-tapí, mpe nyonso wana. Azali nde na mposa nde mitema ya komikitisa etandama, mpo Ye ákoka kozua mitema ya komikitisa oyo mpe ámonisa na bango makambo ya—ya malamú oyo Abombeli baoyo nyonso oyo balingaka Ye.

<sup>9</sup> Sikawa, totunaki. . . Mpe nazali na litatoli moko oyo nakolinga ko—kopesa. Sikawa, soki nazali na libunga na likambo oyo; nauti koyoka yango, mpe ekoki kosalema ete nazali na libunga. Kasi nakanisi bato yango bazali awa, baoyo litatoli yango etali bango.

<sup>10</sup> Boye, eleki mwa mikolo, ntango nazalaki epai nakómi kofanda sikawa, na—na Arizona, toyambaki mbé—mbéla moko oyo elobaki ete mwana mobali moko azalaki na bokono ya rhumatisme articulaire aigu. Mpe yango ekei kino na motema. Mpe akómaki mpenza. . . Tata ná mama na ye bazali baninga na ngai ya motuya mpenza. Ezalaki. . . moko na basungi na biso awa, na losambo oyo, Ndeko Collins. Mwana na ye ya mobali, Mikey moke, oyo asakanaka ná Jo, azalaki na bokono ya rhumatisme cardiaque. Minganga bautaki kozongisa ye na ndako, balálisaki ye na mbeto, mpe bayebisaki baboti na ye ete bátika ata te ete átelema, átombola motó mpe te, mpo na komela mai. Akómaki komela mai na mwa tuyó; azalaki kobela makasi. Mpe baboti, bazali bandimi, basámbelaka na tabernacle oyo, mpe bandimaka.

<sup>11</sup> Eleki mwa bampokwa, ezali te ete tolingaki kozela, toyebisaki na ntina na liyangani ya kobondela mpo na babeli mokolo ya Lomingo. Kasi, lokola tosengli koyanola na mituna, na bongo tosengelaki kolongola liyangani ya kobondela mpo na babeli.

<sup>12</sup> Na bongo nazalaki na mwa likambo moko oyo nazalaki kobómba na kati na ngai, na motema na ngai.

<sup>13</sup> Mpe mama ná tata na ye balingaki koyeba soki bakokaki komema mwana yango na—na biró. Mpe bamemaki mwana yango kuna, mpe Molimo Mosanto alobaki ete abiki.

<sup>14</sup> Na bongo, baboti na ye, lokola bamémiaki yango, bazongaki na mwana yango na ndako mpe batindaki ye na kelasi, batindaki ye kaka na kelasi.

<sup>15</sup> Monganga ayokaki yango, boye, monganga asepelaki mpenza na likambo ya ndenge wana te. Boye ayebisaki mama na ye ete mwana yango asengelaki kozala na mbeto, na ntembe te. Mpe ye abetelaki ye lisolo yango. Nakanisi ete mobali yango azali, soki nasosoli malamú, azali mondimi Moklisto, ya dénomination moko. A—asámbelaka epai ya ba-Adventiste du Septième jour, monganga yango. Boye alobaki: “Ee, bosengelaki. . . ntango ekoki mpo nátala nzoto ya mwana

yango.” Alobaki: “Bosengelaki, ata bongo, kotalisa nzoto ya mwana yango.”

Ye maman alobaki: “Malamu mingi.”

<sup>16</sup> Amemaki mwana yango kuna, mpe monganga atálaki nzoto ya mwana, atalaki makila na ye, epai rhumatisme articulaire aigu ezali. Na bongo, nasosolaki ete monganga akamwaki mingi, ayebaki te likambo nini kosala. Mwana yango akómi mpenza malamumu, na nzoto kolongono, bamonaki ata . . . ? . . . te.

<sup>17</sup> Sikawa, libota Collins bazali awa? Ntango mosusu nalobi yango malamumu te. Nalingi . . . Ezali bongo, Ndeko mwasi Collins? Iyo. Malamumu. Iyo. Mikey Collins ye wana, azali kaka na mibu pene na motoba to nsambo.

<sup>18</sup> Esalemaki awa na kati ya biró, eleki bampokwa pene na misato. Oh, bango . . . Esengelaki na Moto moko oyo aleki bato ázala kati na biró wana! Ezali Jehovah mo—monene mpe na nguya, ezali solo, oyo ayaka kokumisa Liloba na Ye. Mpe na—nazongisi matondi mingi koyoka yango. Bomoni? Nayebi ete biso nyonso tozongisi matondi. Kaka ngai te, kasi biso nyonso, mpo, bongo soki ézalaka—ézalaka mwana na yo moke ya mobali to mwana na ngai moke ya mobali?

<sup>19</sup> Mpe, bómikanisela, nazopesa nde litatoli, bobele moko, mpe nakozua moko awa mpe mosusu kuna. Ezali kosalema bisika nyonso, kasi ezali kaka mpo bóyeba ete—ete lotómo na ngai ya solosolo ezalaka na ntina na lobiko ya nzoto na Bonzambe. Kasi bino . . . Nazali awa mpo na Bilembo oyo. Mpamba te, nsima na mwa ntango, bokososola mpo na nini nasengelaki kosala oyo. Mpe, boye nazali molakisi te, nazali moto na theologien te. Na—nabondelaka kaka mpo na babeli, mpe nalingaka Nkolo. Mpe sikawa, sikawa, na likambo oyo, atako, ete . . .

<sup>20</sup> Lobi na mpokwa topesaki litatoli ya mwana moke ya mwasi . . . nazali na nkombo na ye. Mpe Billy azali na yango awa sikawa, esika moko boye, nkombo ya baboti na ye mpe banani bango bazali. Mwana mwasi yango akómaki na etape ya nsuka ya bokono ya leucémie, akómaki pene na . . . Azalaki kobela mpenza na lolenge ete bakokaki lisusu koleisa ye na monoko te; asengelaki ko . . . basengelaki kozongisa ye makila na nzela ya misisa. Mpe azalaki mwa mwana mwasi moko kitoko. Azalaki moke kotala mbula na ye, pene lokola mwa mwana mwasi oyo, nabanzi. Kasi azalaki molai *boye*, mpenza . . . Bazalaki lokola mingi kati na biso. Okokaki koyeba ndenge mwana yango alataki, ete . . . ná baboti, ete bazalaki mpenza babóla, babóla mpenza, mpe, boye, kasi bazalaki na limemia mpenza. Mpe Molimo Mosanto alobaki ete mwana yango abiki.

<sup>21</sup> Sikawa, bókanisa yango naino, mwana yango azalaki ná leucémie. Mpe makila na ye ezalaki mpenza ya kobeba na lolenge ete bakokaki lisusu ata koleisa ye na monoko te. Asengelaki kozua, kokende na lopitalo mpo bápesa ye makila, to bázongisa

ye makila na nzela ya misisa, mpo na koleisa ye; Nabanzi ezalaki glucose, to soko nini. Nayebi elobeli ya minganga te mpo na bokono yango, kasi, ata bongo, asengelaki koleisama ndenge wana. Mpe liboso mwana yango álongwa wana, alelaki bápesa ye hamburger.

<sup>22</sup> Mpe baboti na ye, nsima na bango koyoka Molimo Mosanto koloba YANGO ELOBI NKOLO, bomoni, ba . . . Mpe, bango, bazalaki bapaya, batikalá kozala awa te liboso. Kasi ba . . . Ba—babálani moko ya kala, bato malamumu, bauti kopesa bango bisika ya kofanda, kala mingi te, Ndeko mobali ná Ndeko mwasi Kidd, bango nde balakisaki bango oyo basengelaki kosala, mpe oyo basengelaki koyoka. Mpe mwana yango aliaki bilei na ye na nzela ya kozonga epai na bango.

<sup>23</sup> Mikolo mibale to misato nsima na yango, kuna na kelasi. Akendeki mpe epai ya monganga, mpe monganga yango akamwaki mingi mpenza! Alobaki: “Ata nzolóko moko ya leucémie etikali te na nzoto ya mwana yango.” Bomoni? Sikawa, wana esalemaki na mbálakaka, mbala moko, ezalaki Nguya ya Nzambe na-Nguya-nyonso, kozua makila mpe kopetola yango, mbala moko, mpe—mpe kozongisa koningana ya—ya bomoi ya sika na kati na yango. Mpamba te, ma—makila na yo ezali bomoi na yo, ya kufa. Mpe kokela ba-cellule ya sika, mpe kopetola oyo ya kala! Mpe—mpe oyo yango ezali, ezali mpenza . . . Nakoloba boye, ezali mosala ya bokeli ya Nzambe na Nguya nyonso; kozua ma—makila oyo ebébisami na cancer, na lolenge ete mwana moke yango akómaki na lángi ya mosáka mpe avímbaki, mpe, kaka na mwa ntango moke, kokómisa yango makila ya sika mpenza!

<sup>24</sup> Nandimi . . . Nakoloba yango na Nkombo na Ye te; nakoloba yango na . . . na emoniseli ya kondima na ngai, likambo oyo esalemaki na Sabino Canyon mokolo mosusu wana. Nandimi ete ntango ezali kopusana, nyango oyo binama oyo ezangi na nzoto ekozongisama, ná Nguya ya nkembo ya Mokeli. Na—nandimi ete, soki Akoki kosala ete eséndé émonana, oyo ezangi . . . Awa ekómi likambo ya mobali to mwasi, oyo azangi mpenza eteni moko ya nzoto. Mpe wana ezali nyama mobimba mpenza, na yango moko. Azali Nzambe. Na—nalingi Ye.

<sup>25</sup> Ee, sikawa, soki nabandi kolobela makambo wana, tokokoba kaka kolobela yango. Mpe bato batelemi zinga-zinga na bitutu, na ba-couloir, na ba-biró ná bongo na bongo, boye nakokende semba na Nsango yango.

<sup>26</sup> Mpe nalingi koloba boye, mpe nalingi kopesa matondi na Ye Oyo azali bisika nyonso. Mpe, lelo, wana nayebaki eloko moko te na ntina na Elembo ya Mitano, Eyaki na lolenge moko wana ya kokamwa, na ntongo ya lelo, pene na ngonga moko liboso ntongo étana, ntango nazalaki kobondela. Mpe lelo . . .

<sup>27</sup> Mikolo mitano to motoba oyo, nazali kaka kofanda na mwa esika moko, nazali kokutana na moto moko te. Nazali kaka

kobima mpo na kolia bilei na ngai elongo ná—ná moninga moko, ná baninga na ngai mosusu oyo bazalaka awa. Mpe, na ntembe te, boyebi nani moninga yango azali, ezali Ndeko mobali ná Ndeko mwasi Wood. Iyo. Mpe—mpe boyebi, mpe nakendeki kuna mpe—mpe nazali kofanda epai na bango, mpe bato nyonso bazali mpenza malamumu. Mpe likambo moko te esalemaki, kaka . . .

<sup>28</sup> Nazomeka kotikala mpenza ná Nsango wana ya Bilembo oyo. Ezali na motuya, nandimi ete ezali—ezali ngonga ya ntango ya komonisama na Yango, ya emoniseli na Yango.

<sup>29</sup> Sikawa nalingi ete bóndimisama mpenza sikawa, na ntango malamumu, liboso, noki mpenza soki bokoki, bócoma makambo oyo bozali kososola te, na—na ntina na Bilembo Nsambo oyo, soki bozali na yango, mpe bótia yango na eteyelo. Mpe ntango mosusu Ndeko Neville to moto mosusu akoki kotia engóngólo moko awa. [Moto moko alobi: “Engóngólo yango oyo.”—Mok.] Oh, yango oyo—yango oyo, namoni yango sikawa. Ezali malamumu. Nakosepela kozua yango na mpokwa oyo, mpo nákoka ntango mosusu koyekola yango mwa moke, mpo na mokolo ya Lomingu na ntango. Sikawa, bó, mbala oyo, kaka mbala oyo, bótona te mituna lokola, ndakisa: “Ndanga ya Molimo Mosanto ezalaka nde *oyo*?” Bomoni? Na—nakosepela koyeba ete ézala na ntina na oyo nauti koteya, bomoni, mpo tókoka kotalisa likambo moko oyo mpenza (ndakisa, Bileko ya Lingomba), bomoni, mpamba te yango nde tozolobela sikawa.

<sup>30</sup> Sikawa, ndakisa, soki tolingaki kobondela mpo na babeli, na bongo, ekosenga ntango mosusu li—libondeli ya ndenge mosusu. Mpe opakolami, oyei mpo na likambo ya ndenge mosusu, boyebi. Mpe ozoluka Nzambe, mpo óyeba: “Moto moko nde akozala wana na mpokwa ya lelo, Nkolo?”

<sup>31</sup> “Iyo, ekozala mwasi moko oyo akolata robe ya mosaka, akofanda na sóngé ya loboko ya mobali. Mpe ntango okobenga ye, bénga ye na nkombo *oyo*. Mpe loba ete asalaki *boye* mpe *boye*. Mpe azali na likambo *boye-na-boye*.” Nsima na yango okei kuna mpe otali malamumu, mpe tala ye wana. Bomoni? Yango mpenza, bomoni. Ekeseni. Bomoni?

<sup>32</sup> Kasi na ndenge oyo, libondeli na ngai ezali: “Nkolo Yesu, ndimbola na Oyo ezali nini? Mónisa ngai Yango.” Amen.

<sup>33</sup> Sikawa tóbimisa lisusu Mipanga na—na biso sikawa, ná, Liloba.

<sup>34</sup> Nasepelaka na lisungi ya molimo ya Ndeko Neville, mpe bolingo na ye ya bondeko, awa na nsima na ngai, kobondeláká mpo na ngai. Mpe bino nyonso kuna, pelamoko. Mpe, sikawa, lokola mpokwa oyo ezali mpokwa ya mokolo ya Mitano, tokomeka kosala ete é . . . biso . . .

<sup>35</sup> Tokoki kolobela makambo nyonso te. Bino . . . Mpamba te, okoki kozua Yango, bobele moko na Bilembo wana, mpe kotikala, kaka—kaka koteya Yango na kati ya Makomi mobimba,

mpenza-mpenza. Bomoni? Ekoki kozua basánza ná basánza ná basánza, mpe okosilisa Yango kaka te, mpamba te e—Elembo Yango moko ekangi Makomi mobimba, kobanda na Genese kino na Emoniseli, Elembo moko na Yango.

<sup>36</sup> Boye, oyo namekaka kosala, ezali, komipekisa kokende mosika na Yango, nakomaka Likomi moko, to—to mwa likambo moko awa, esika moko, mpo nátikala...Nátikala kaka na likambo moko wana, nasengeli kokóba kotala yango, mpamba te, ngai...Na kolobáká, nalobaka na—na nzela ya...Na—nabanzi ete ezali mpémela oyo esengeli. Na nsima ntango na—ntango nakitisaka miso mpo na kotala...Mpe na—nabandi koloba, mpe namoni ete nazali kobima libanda na motó ya liteya, nakobaluka, nakotala na ngámbo mosusu, mpo námeke kozua Likomi mosusu, mpo na kolobela yango, bomoni, mpo námeke kotalisa yango mwa polele koleka na ngámbo yango, na esika ya koluka kokóba na yango.

<sup>37</sup> Na bongo sikawa, na mpokwa oyo tokoyekola, na ngolu na Nzambe, na lisungi na Ye, E—Elembo ya Mitano. Ezali mokuse. Ezali mwa molai koleka oyo mosusu. Babuti-mpunda minei, sikawa, moko na moko ezalaki na milongo mibale, kasi oyo ezali na milongo misato. Sikawa, Elembo ya Mitano ebandi na mokapo ya 6 ya Emoniseli, na molongo ya 9.

<sup>38</sup> Sikawa, soki esalemi ete ozali mo—mopaya oyo ayokaki babuti-mpunda minei wana te, boye, yo...Bomoni, mbala mosusu, to—tozóngaka moke na nsima mpo na—mpo na kobakisa mwa likambo moko, mpe, ntango osali bongo, ozozela ete bato básosola Yango. Boye, soki ezali na mwa likambo moko ozososola te, ee, yikela biso kaka mpiko mwa moke. To, zuá bande mpe yoka Yango, mpe—mpe nandimisami ete oko—okozua lipamboli uta na Yango. Ngai nazopambolama. Na—nalikii ete bino mpe bo—bozali kopambolama.

<sup>39</sup> Sikawa, soki bino nyonso bomilengeli, kobanda na molongo ya 9, kino na 11, to ná molongo ya 11 mpe.

*Wana ekangolaki ye elembo na mitano, namonaki na nsé na etumbelo milimo na bango basili kobomama mpo na liloba na Njambe, mpe mpo na litatoli litatolaki bango:*

*Bangángaki na mongongo makasi ete, Kino ntango nini, e Nkolo mosanto mpe na solo, o...kosambisa te mpo na kobukanisa bango bafandi na mokili na ntina na makila na biso?*

*Elamba mpembe epesami na bango moko moko; mpe elobamaki na bango ete naino mwa—mwa ntango moke bakopema, kino ekokoka motuya na bancinga na bango baombo...bandeko na bango baoyo bakobomama lokola esili bango mpenja kobomama.*

40 Sikawa, ezali mpenza likambo ya kobombama. Sikawa, mpo na ntina na ba-bande, ná bakambi ya mangomba mpe balakisi oyo bafandi awa, sikawa, soki bomonaka kokesana na Oyo; ezalaki mpe bongo mpo na ngai. Kasi nazali kaka koteya Yango na nsé ya mpémela oyo ebongoli na mobimba mpenza lolenge na ngai ya komona Yango. Bomoni?

41 Na nsima nayeí komona, ndenge ozali komona makambo oyo komonisama, Ezali kokangama mpenza mpe komema bileko ya lingomba wana ná Makomi elongo, mpe kokangisa Yango makasi. Bomoni? Mpe yango nde ntina oyo nandimi ete Euti na Nzambe. Sikawa, tosósoli yango.

42 Mpe nazali kokanisa ete bambala mosusu totálelaka oyo molakisi monene moko akokaki koloba na ntina na Yango. Bomoni? Mpe ezali—ezali mabe te. Nakweisi molakisi yango te, ata moke te. Mpe nakweisaka moto moko te. Nakweisaka kaka lisumu, kozanga kondima; moto te.

43 Mpe bato mosusu balobaka: “Okweisaka bibongiseli.” Te, nasalaka yango te. Na—nakweisaka nde mimesano ya bibongiseli; bato oyo bazali na kati kuna te, etonga ya bato oyo basalaka ebongiseli yango, boyebi. Kasi mimesano oyo bazoyángelama na yango, yango nde nakweisaka, ya ba-Katoliko ná ba-Protestant, ndenge moko. Oh, la la! Na . . .

44 Baike na baninga ya malamú koleka oyo—oyo—oyo ngai nayeí, bazali ba-Katoliko, kaka ba . . .? . . . Bozali kososola . . . Mpe moto yango akoki kozala awa na mpokwa oyo, ntango mosusu azali awa. Nzela bobele moko oyo tozwaki makoki ya kotonga tabernacle oyo, ezali mpo MoKatoliko moko ya Roma atelemaki kuna na tribinále, mpe akendeki liboso mpo na kozwa ngámbo na ngai, mpe, oh, ndenge moto moko te akokaki kosala yango. Ya solo. Mpe bakokaki koboya yango te. Ya solo.

Mpe bazalaki koloba: “Bango basalaki mituya yango mpo na ‘bato ebele mpenza.’”

45 Ye alobaki: “Oh, yango ekobakisa bakiti ntuku mwambe na losambo yango te, ndenge wana.” Alobaki: “Losambo wana etelemi kuna.” Alobaki: “Na—nayeí mokengeli na yango, mpe nyonso wana.” Mpe alobaki: “Losambo yango ezalaka wana.” Alobaki: “Soki bino nyonso botikali bozali kobakisama, bongo mpo na nini bango te?” MoKatoliko ya Roma, moninga na ngai ya malamú. Bomoni? Iyo, misie.

46 E—elenge mobali moko, azali mo—MoKatoliko, moninga na ngai ya malamú mpenza, azalaki kosolola na ngai, azalaki na quincailleterie moko boye; liboso nákende, alobaki: “Billy, na—nayeí ete ondimaka mimesano ya losambo na biso te.” Alobaki: “Kasi nazoyebisa yo sikawa,” alobaki, “Nzambe ayanolaka mabondeli na yo mingi mpenza mpo na biso! Nandimi ete, soki ozui mikakatano ata esika nini na ekólo,” alobaki, “ba-Katoliko nyonso ya etúka bakoya kosunga yo.” Boye, bomoni, ezali . . .

47 Alobaki: “Bamèmi-ekulusu nyonso,” abengaki yango bongo. Nakoloba yango kaka ndenge ye alobaki yango. Na ntembe te, bamibengaka bongo mpo Baklisto ya ebandeli bazalaki kolata ekulusu na mokongo. Toyebi yango na histoire. Mpe bamibengaka Baklisto ya ebandeli, oyo bongo bazalaki, kasi mimesano nde ebimísá bango libanda na nzela, bomoni.

48 Mpe bato yango, ézala MoKatoliko, to Moyuda, to banani, bazali bato oyo baútá na nzete moko oyo biso touíteli. Bomoni? Ya solo. Bazali—bazali bato oyo balingaka, baliaka, bamelaka, balálaka, mpe lokola bato mosusu nyonso. Na bongo, tosengeli ata moke te kokweisa bato, te, moto moko te, bomoni. Kasi, tosengeli ata moke te kokweisa bato.

49 Kasi, lokola motei, nasengeli kobeta nyoka wana kuna, oyo ezali koswá bato yango, bomoni. Mpe nasalaka te—mpe kutu nasalaka te. . . Mpo na ngai, ngai moko, nakolinga kosala yango te soki ezalaki te etinda kouta na Nzambe, oyo natindami kosala yango, bomoni. Mpe nasengeli kokangama na solo mpe sembo wana.

50 Kasi soki MoKatoliko, Moyuda, to moto nani ayei awa, ázala Mizilman, Greki, to Orthodoxe, to oyo nyonso ye akoki kozala, soki ayei awa mpo tóbondela mpo na ye, nakobondela mpo na ye na bosembo nyonso, ndenge nakosala mpo na baoyo ya ngai moko. Ya solo. Na ntembe te, mpo azali moto. Mpe nabondelá mpo na ba-Bouddhiste, ba-Sikh, ba-Djain, ba-Mizilman, ná—ná bato ya ndenge na ndenge, bomoni, ndenge wana. Mpe natunaka bango mituna te; nabondelaka kaka mpo na bango, mpamba te azali moto, moto oyo alingi kozala na nzoto kolongono, mpe komeka kosala ete bomoi ékóma mwa pete mpo na bango, nzela-nzela.

51 Sikawa tososoli ete kati na oyo, mpe mingi kati na bino awa oyo nayebi, ezali na bato mibale to misato, bato ya mayele ya solosolo, oyo bafandi awa. Mpe—mpe bazali na mayele mingi, mpe batángá ma—mateyo ya bato mosusu na ntina na likambo oyo. Mpe nalingi ete bandeko oyo báyebe ete na—nazokweisa bato wana te. Nazoloba bobele oyo Nkolo alakisi ngai. Mpe yango nde nyonso oyo nazali na yango.

52 Sikawa, tolingi ata moke te kokanisa ete, mpo mwasi moko boye asukolelaka bato bilamba to—to mwa mobali moko boye ya mokati bilanga kuna, akokaki te kozua emoniseli uta na Nzambe. Mpamba te, bomoni, yango. . . Nzambe, Amimonisaka mpenza na komikitisa. Yango nde, tomonaki mokolo ya Lomingo, mpo na kobanda oyo, ete Amimonisaka Ye moko na komikitisa na Ye. Yango nde oyo ekomisaka Ye monene.

53 Sikawa bó—bótika ná—bótika nálobela yango lisusu mwa moke. Eloko oyo esalaka ete Nzambe ázala monene, ezali mpo Akoki komikitisa Ye moko mingi. Yango nde ekomisaka Ye monene. Nzambe azali monene, kasi Akoki kozua lolenge ya

komikitisa mingi na lolenge ete bato ya bwanya ya mokili oyo bakokaka komona Ye te. Bakokaka na bango komona Ye te, mpo Amikitisaka mingi koleka. Sikawa bótala malamumu. Mpe oyo, na yango moko, nde libombami ya emoniseli ya Yesu Klisto. Bomoni? Oyo, na yango moko, nde e . . . Ezali . . . ekoki kozala na eloko moko te ya monene koleka Nzambe. Mpe bokoki kosala eloko moko te ya komikitisa lokola Ye amikomisaka. Bomoni, yango nde esalaka Ye monene. Bomoni?

<sup>54</sup> Sikawa, moto monene, akoki bobele kokóma lisusu mwa monene koleka, to ntango mosusu akoki kongumbama mpo na koloba na yo: “Ndenge yo?” na yo, bomoni, to eloko moko ya ndenge wana. Kasi akoki komikómisa moke te. Ezali kaka na eloko moko boye na ntina na ye. Azali moto. Akokoka na ye komikómisa moke te. Mpamba te, soki abandi kokóma moke mingi koleka, na bongo, na mbala moko, akosengela kolobela oyo moto mosusu asalaki, ndenge wana. Na nsima abandi lisusu komitóbola, bomoni.

Kasi, nzela mpo na komata, ezali na kokita, kati na Nzambe. Iyo.

<sup>55</sup> Bato ya bwanya ya mokili bazali koluka komona Ye, na bwanya na bango. Bazali kaka nde komata mosika na Ye, na kosaláká bongo. Bomoni, bato ya bwanya ya mokili, bamekaka kolimbola makambo na mathématique to eloko moko boye. Bóbosana te, Atiaki kutu yango . . . Na Biblia, na Emonis- . . . Te, bolimbisa ngai.

<sup>56</sup> Na Yisaya 35, nabanzi ezali, ete ata ezali mpenza—ezali mpenza na komikitisa mingi na lolenge ete ata mo—mo—moto mabe akososola Yango. Bomoni? Oh, “ata zoba mpenza akobunga wana te.”

<sup>57</sup> Bato ya bwanya balekaka mosika na yango, ná bwanya na bango, kokendéké mosika na Ye, na kolukáká komona Ye na nzela na bwanya. Sikawa, bóbosana yango te. Ekotiana na bande, bomoni. Bato ya bwanya, na bwanya na bango, bakendeke mosika mingi mpo na koluka Ye na nzela na bwanya na bango, bamonaka Ye te, bomoni. Soki bakokaki kozala minene mpenza mpo na kokóma mike mpenza, bakokaki komona Ye. Soki bozali minene mpenza mpo na kokóma mike mpenza! Bomoni yango? Mpe, boyebi, yango—yango mpenza ezali Solo.

<sup>58</sup> Nakendé kotala bato, na ba-biró na bango, ná bisika mosusu, bazalaki mpenza mibali, bato minene, bakonzi, bomoni, ná bayangeli minene, bankúmu, mpe na momesano bazali bato minene. Lisusu, nakendé na bisika oyo moto moko azalaki kaka na bilamba mibale, ndakisa, motei moko boye oyo alingaki kowelana ná ngai mwa moke, mpe o—okokaki kokanisa ete mokili ekotambola te soki ye azali te, bomoni. Mpe oyo wana—oyo wana ezali kaka kovimba motó, bomoni. Kasi, moto monene,

moto monene afandaka mpe alukaka kosala ete yo ókanisa ete *yo nde* moto monene. Bomoni? Bomoni? Akoki komikitisa.

<sup>59</sup> Mpe, bomoni, Nzambe azali monene mingi na lolenge ete Akoki komikitisa, na esika oyo moto akoki kokita kino wana te, bomoni. Esili. Mpe bango. . .

<sup>60</sup> Mpe bazoluka komona Ye. Sikawa bótala. Bazoluka komona Ye na kotindáká bana mibali na kelasi, mpo bázua diplome ya Licence en Lettres. Mpe—mpe bazoluka kozua Yango na elobeli ya likindo ya—ya—ya—ya Biblia. Mpe bazoluka komona Ye na manaka ya kelasi, na manaka ya bibongiseli, ná makambo ya kitoko, mpe koluka komona. Azali kuna ata moke te. Bozobunda nde na mopepe, esili wana. Bozo—bozokende mosika na Yango.

<sup>61</sup> Soki bakokaki kozala minene mpenza mpo na kokóma—mpo na kokóma mike mpenza, bakokaki komona Ye na ngámbo wana: na kokómáká moke. Kasi na ntango nyonso oyo bozokende na ngámbo ya bwanya, bozali kokende mosika na Ye.

<sup>62</sup> Sikawa bótika ete nálobela yango mpo bózanga yango te. Na ntango nyonso oyo bozoluka komona Nzambe na nzela na bwanya, ndenge esalemaki na elanga ya Edene, ndenge esalemaki na mikolo ya Mose, ndenge esalemaki na mikolo ya—ya Noa, ndenge esalemaki na mikolo ya Klisto, na mikolo ya Yoane, na mikolo ya bantoma, mpe kino na mokolo oyo! Soki boluki kosósola Yango, mpe boluki komona Nzambe na bwanya, bokozala ntango nyonso kokende mosika na Ye. Bozoluka kosósola Yango. Nzela ya kososola Yango ezali te. Bóyamba Yango kaka. Bomoni? Bóndima Yango kaka. Bóluka kosósola Yango te.

<sup>63</sup> Nakokaka kosósola te mpo na nini, ete, ee, makambo mingi. Ezali na makambo mingi te nasósolaka to oyo nakoki kosósola. Nakokaka kososola te ndenge nini elenge mobali oyo, oyo afandi awa, aliáka bilei moko oyo ngai nakoki kolia, mpe—mpe, ye oyo, suki etondi na motó mobimba, kasi ngai nazali na suki te. Nasósolaka yango te. Bayebisaka ngai ete calcium nde esalaka bongo; nakakaka te kotika kokata manzáka na ngai ntango nyonso, kasi nazali ata na suki ya kokata te. Na—nasósolaka yango te. ndenge elobamá kala, ngai. . .

<sup>64</sup> Ezali te mpo na kotika makambo ya motuya; kasi, Ezali likambo ya motuya, kasi nakómi naino na Elembo yango te.

<sup>65</sup> Ndenge nini ngombe ya moindo ekoki kolia matiti ya lángi ya mai ya mpondu, ebimisaka miliki ya mpembe, oyo ebóngwanaka mantéka ya lángi ya mosaka! Na ntembe te, na—nakoki kolimbola yango te, bomoni. Mpamba te, bomoni, eloko nyonso eutaka na eloko mosusu. Kasi ndenge esalemaka, nakoki kolimbola yango te.

<sup>66</sup> Nakoki kolimbola te ndenge nini ba-lísí mibale, to bafelele mibale ya lolenge moko, kasi moko ezali motane, mosusu na lángi ya mosaka, mosusu mwa moindo, mpe mosusu bléu. Nasósolaka

yango te. Moi moko nde engengelaka yango. Lángi yango eutaka wapi? Bomoni? Na—nakoki kolimbola yango te, kasi ata bongo osengeli kondima yango.

<sup>67</sup> Nakosepela ete moto monene moko ya likindo álimbolela ngai ndenge mokili oyo etikalaka na nzela na yango. Nakosepela ete, na mayele ya science, bókoka kobwaka bále moko na likoló, oyo ekozala kobaluka, mpe tika yango éleka mbala ya mibale, na esika moko wana. Bokoki kosala yango te. Nzokande, oyo etambolaka mpenza ya kobonga be na ntango, na lolenge ete bakoki koyeba ntango éclipse du soleil ekosalema kino na miniti mpenza, nsima na mibu ntuku mibale. Bazali ata na montre to sáá moko te, masini moko te, oyo ebongi be ndenge wana. Nzokande, ezali wana. Mpe, lisusu, eténgámá. Bongo soki esémbwami mwa moke? Iyo. Bozali kaka komiyokisa nsoni, soki bomeki, bomoni.

<sup>68</sup> Boye, bomoni, bóluka kozua bwanya te, mpo na kososola. Bóndima kaka oyo Ye alobi. Mpe koleka bozali komikitisa, na ntango wana mpenza, bokomona Yango. Sikawa, nazozongisa matondi mingi mpo na yango, matondi na oyo Ye azali, ndenge Amikitísáki. Sikawa, tomoni, mokapo ya 6, molongo ya 9. Bótika ete nábanda sikawa.

*Wana ekangolaki ye elembo ya mitano, namonaki na nsé na etumbelo milimo na bango basili kobomama mpo na liloba na Nzambe, mpe mpo na litatoli. . . litatolaki bango:*

<sup>69</sup> Bótala, balobeli Ezàli-na-bomoi to Ekelamo na bomoi—na bomoi mosusu te, mpo na kopesa liyebisi oyo ya Elembo ya Mitano. Sikawa bómikanisela, na Elembo ya Minei, ezalaki. Ezalaki, na Elembo ya Liboso, ya Mibale, ya Misato mpe ya Minei, kasi ata moko awa te. Bomoni?

<sup>70</sup> Sikawa, soki botali malamau, tótánga lisusu moko na Bilembo. Tózonga na Elembo ya Minei, bomoni. Ezali na molongo ya 7.

*Wana ekangolaki ye elembo ya minei, nayoki mongongo na ezali-na-bomoi na minei koloba ete, Yaka. . . komona.*

*. . . wana ekangolaki ye. . . elembo ya misato, nayoki mongongo na—na ezali-na-bomoi na misato koloba ete, Yaka komona.*

*. . . na ezali-na-bomoi ya mibale. . . Yaka. . . komona.*

*. . . mpe ezàli-na-bomoi ya liboso koloba, Yaka komona.*

<sup>71</sup> Kasi na nsima, ntango tokómi na Elembo ya Mitano, Ezàli-na-bomoi ezali te. Sikawa bótala malamau.

*Wana ekangolaki ye elembo ya mitano, namoni na nsé na etumbelo. . .*

<sup>72</sup> Nokinoki! Bomoni, kuna, Ezàli-na-bomoi ezali—ezali te. Mpe Ezàli-na-bomoi etalisaka nguya. Toyebi yango, bomoni. Ekelamo na bomoi ezali te.

<sup>73</sup> Sikawa, moko na Bikelamo yango, tomonaki, na koyekoláká e—e—emoniseli na mangomba, ete moko na bango azalaki na . . . azalaki nkosi; mpe mosusu—mosusu azalaki ngombe; mosusu azalaki moto; mpe mosusu azalaki mpongo. Tomonaki, na bileko ya lingomba, ete Bizàli-na-bomoi minei wana, elingi koloba banguya minei, esanganaki zinga-zinga na Misala ya Bantoma, kaka ndenge oyo mo—mongombo ezalaki na lisobe. Mpe bosósoli yango, mpo nakozua ntango ya kozóngela yango te. Ndenge toyemaki yango awa, mpe totalisaki yango mpenza! Bazalaki kosénzela likoló na Oyo, Mwana-mpate ná Liloba, mpo na kokokisa Liloba, kaka ndenge basalaki mpo na sa—sanduku ya kondimana, na Esika ya Bulee, kati na lisobe, mpe bongo na bongo.

<sup>74</sup> Sikawa, totalisaki kutu esika ya moko na moko, na balangi ya mabota ya Yisraele, mpe na . . . Bato boni bayokaki bi—Bileko Nsambo ya Lingomba? Nabanzi mingi kati na bino, katikati, bato mibale likoló na misato. Bótala, ete ata lolenge ya Ezàli-na-bomoi ezalaki mpenza bendele ya libota, ndenge mabota minei. . . zomi na mibale ezalaki kotiamana, minei na ngámbo moko moko, to—to mabota misato na ngámbo moko moko. Mpe Bizàli-na-bomoi minei ezalaki wana mpo na kosenzela likoló na mabota yango, na ngámbo nyonso minei.

<sup>75</sup> Mpe, ntango, tokendeki mpe tozuaki Nsango-malamu, mpe totalisaki yango mpenza. Ntango okoti na kati ya sanduku yango, bazalaki kobatela sanduku ya kondimana. Na nsima tomonaki ete kondimana ya Lingomba ya sika, etaliseli na Yango na mokili, ezalaki Molimo Mosanto. Makila esilaki kotindela biso Molimo Mosanto. Mpe Bizàli-na-bomoi minei bazalaki etaliseli, lokola ma—mabota zomi na mibale ya Yisraele, ndenge bazalaki kosenzela. Mpe tomonaki ndenge na bango, mpe tozalaki kozua lolenge moko wana mpo na kokokanisa yango na moko na moko na baNsango-malamu minei wana, mpenza, ezalaki mpenza ndenge moko. Moko ezalaki kolobela nkosi, mosusu ngombe, mpe mosusu. . . Nsango-malamu nyonso minei! Yango mpenza. Nsango-malamu minei ezali kobatelama ya Molimo Mosanto. Amen.

<sup>76</sup> Namitunaka mpenza ntango nyonso. . . Ekangámá ngai na makanisi. Sikawa, ekokisi pene na mibu pene motoba, nabanzi, uta nayókáki moto monene moko koloba ete ezalaki e. . . “Misala ya Bantoma ezalaki kaka botango.” Nayoká bato koloba yango mbala mingi. Kasi koyoka moto monene lokola ye, lokola motei mpe lokola molakisi, oyo akomá mwa babúku oyo eyebani mingi, oyo bato batángaka bipai nyonso, koloba ete Misala ya Bantoma ebongaki mpenza te mpo na kozala malakisi ya Lingomba!

<sup>77</sup> Nzokande, Misala ya Bantoma ezali mpenza mobóko na Yango; botango te. Mobóko nde! Mpamba te, Biblia elobi ete mo—mo—mobóko ya Nzambe “etongami likoló na Mateyo ya bantóma,” ya solo, “Klisto azali Motó, Libanga ya litúmu.”

<sup>78</sup> Mpe ntango moto oyo atelemaki wana mpe alobaki bongo, na—na—na—na—na. . . Motema na ngai elembaki mpenza. Mpe namilobelaki: “Kokamwa te.” Ee, namoni sikawa, na kati ya Bilembo. Emonisamaki nde te. Esili. Bomoni?

<sup>79</sup> Boye, bazalaki wana, batelemaki wana, kasi ezalaki na eloko moko wana, oyo ezalaki koloba yango. Sikawa, bótala, basénzelaka.

<sup>80</sup> Sikawa, ntango tozuaki Matai 28:19, mpe toyekolaki likambo yango kati na Matai, oyo ezalaki etaliseli ya nkosi. Na bongo kuna tomonaki mpenza mpo na nini babátisaka na Nkombo na Yesu Klisto. Mpe Atelemaki wana, ná Likomi yango mpenza, mpo na kobatela libula ya búlee ya libatisi, na Nkombo na Yesu Klisto. Malamu. Ee, nabandi kokende mosika na kati ya Bileko ya Lingomba sikawa.

<sup>81</sup> Bótala. Kasi, awa, ntango tokómi na Elembo ya Mitano sikawa, ezali—ezali—ezali na mobuti-mpunda moko te abimi, mpe ezali na Ezàli-na-bomoi moko te mpo na kosangela Yango. Yoane. . . Mwana-mpate afungolaki Yango, mpe Yoane amonaki Yango. Moto moko te azalaki wana mpo na koloba: “Sikawa yaka kotala. Yaka komona.” Bótala, nguya moko te ya Ekelamo na bomoi. To ezali na. . .

<sup>82</sup> Mpe na Elembo ya Motoba, ezali na Ezàli-na-bomoi moko te mpo na kosangela Yango. Mpe na Elembo ya Nsambo, ezali na Ezàli-na-bomoi moko te mpo na kosangela Yango, nguya moko ezali te mpo na kosangela Yango, bomoni, moto moko te mpo na kosala yango. Na ya, bótala, na ya. . . Nsima na Elembo ya Minei, ezali na liyebisi moko te na nzela ya Ezàli-na-bomoi, kobanda Elembo ya Mitano, ya Motoba, to ya Nsambo, ata moko te.

<sup>83</sup> Sikawa bótala, naleli yango, lokola na bantango ya mobuti-mpunda na ba-mpunda minei, mobuti-mpunda, bomoko, ya bampunda minei ekeseni, ezalaki na Ezàli-na-bomoi moko oyo asangelaki nguya yango. Mbala nyonso oyo mobuti-mpunda azalaki komata na mpunda mosusu mpe kopusana mpo na kokende, Ezàli-na-bomoi ya ndenge mosusu azalaki koya kosangela ete: “Libombami monene yango wana.” Bomoni? “Libombami yango wana.” Mpo na nini? Kopesáká liyebisi ya libombami.

<sup>84</sup> Mpo na nini mosusu azali te, awa na Elembo ya Mitano, mpo na kosangela Yango? Tala yango oyo, kokokana na emoniseli oyo Nkolo Yesu apesaki ngai lelo, bomoni, to na ntongo ya lelo, na ntongo-ntongo: Ezali ete, libombami ya bileko ya lingomba esili kosila mpenza, na ntango oyo, Libombami ya motemeli-na-Klisto esili komonisama, na ntango oyo, motemeli-na-Klisto

asili komata mpunda na ye ya nsuka, mpe tomonaki ye likoló na mpunda ya lángi lokola mpondu, esangáná ná balángi na ye kili-kili, mpe azali kokóba kokende kino na libebi (Tokolobela yango na Bakelelo, mpe bongo na bongo, ntango tokoteya yango. Nakokaki kolobela yango sikawa, kasi tokobima lisusu libanda ya mokonza. Mpe to—toko . . . azali kokóba kokende . . .), yango nde ntina oyo moko te azali kuna.

<sup>85</sup> Sikawa, toyebi, ete ekomami, mpamba te ezali mosusu mpo na likambo moko. Sikawa, bómikanisela, liboso, na ebandeli, nalobaki ete eloko moko te ekoki kosalema kozanga ntina. Boyebi lisusu mpo na mwa litanga ya mai ya biki oyo? Bomoni? Sikawa, bosengeli koluka ntina na yango.

<sup>86</sup> Ee, ezalaki na ntina moko oyo bazalaki na ntina ya Ezàli-na-bomoi te, to nguya, mpo na koyebisa bofungwami ya Elembo oyo, Mpe bobele Nzambe nde akoki komonisa ntina yango, esili, mpo nyonso—nyonso ezali na maboko na Ye.

<sup>87</sup> Kasi ntina oyo Amonisi Yango, ndenge nasósoli, ezali mpo libombami ya Buku ya Lisiko, na oyo etali komonisama ya motemeli-na-Klisto, mpe na ntango yango moko, Lingomba esili kokende, mpe makambo oyo ezosalema ata na eleko ya lingomba te, ata moke te. Ya solo. Ezali—ezali mosika na eleko ya lingomba. Lingomba esili mpenza konétolama, na ntango oyo. Lingomba emati na mokapo ya 4 ya Emoniseli, mpe Ekozonga te kino Ézonga elongo ná Mokonzi na Yango, na mokapo ya 19. Kasi Bilembo oyo ezali komonisa makambo oyo ezalaki, oyo ezali, mpe oyo ekozala. Bomoni? Mpe, sikawa, oyo esengelaki kozala mpo na eleko ya lingomba, emonisamaki na nzela na Bilembo oyo. Mpe, bótala malamumu nini oyo Yango ekosalema.

<sup>88</sup> Bi—bitape minei ya mobuti-mpunda na ye esili komonisama. Bitape minei ya motemeli-na-Klisto, likoló na mpunda, esili komonisama na ntango oyo, na yango basengeli na yango lisusu te.

<sup>89</sup> Mpe ezalaki na Bikelamo na bomoi ya Nzambe minei, mpo na kosangela mobuti-mpunda wana bazalaki kotambola. Bizàli-na-bomoi minei ezali banguya minei. Sikawa, toyebi ete *Ezàli-na-bomoi* yango, na ndimbola ya maloba ya bilembetele ya Biblia, elingi koloba “nguya.” Sikawa, tótala yango na bokebi. Bizàli-na-bomoi minei, na Biblia, ezali kotalisa ya nguya katikati na batu.

<sup>90</sup> Sikawa, soki totali malamumu, ndakisa, na Daniele, ntango amonaki ekólo moko kotelema, ekokaki kozala ntango mosusu ngombolo asimbi mokuwa ya mopanzi na ye, na elembetele. Na nsima amoni nguya mosusu kotelema, ntaba. Ezalaki kotalisa likambo moko. Na nsima amoni nguya mosusu kotelema, mpe—mpe ezalaki nkoyi oyo ezali na mitó ebele. Ezalaki kotalisa bokonzi moko boye. Na nsima amonaki mosusu kotelema, nkosi moko ya monene, ná míno, mpe—mpe ezalaki konyata biloko

oyo etikali. Yango ezalaki kotalisa nguya ya ndenge mosusu mpenza. Moko ezalaki bo—bokonzi ya Nebukadanesala; mpe mosusu, na—na ndoto moko boye. Daniele amonaki emononeli; Nabukadanesala alótaki ndoto moko. Kasi Daniele alímbolaki ndoto na ye, mpe ekokanaki mpenza ná emononeli yango.

<sup>91</sup> Amen! Fiuu! Oh! Soki bóyebaka likambo oyo esalemaki! Likambo nini esalemaki liboso tólongwa awa? Bososoli? Ee, ndoto motoba elandanaki mpe ekokanaki mpenza na emononeli yango. Amen. Bomoni? Ndoto oyo elimbolami, ezali emononeli. Mpamba te, ntango mosusu, moto oyo abótámá te ná subconscious, mpo na komona makambo wana azali ya kolamuka, na bongo Nzambe akosala na subconscious yango mpo na koloba na ye. Kútu, Alakaki yango, na bandoto, na mikolo ya nsuka, Akoya kotala bato, ná bimononeli mpe. Bomoni?

<sup>92</sup> Sikawa, emononeli ezalaka ntango ozali ya kolamuka mpenza, otelemi kaka boye, mpe makambo mosusu ezali komonisamela yo. Mpe otelemi wana, mpe ozali koyebisa bango likambo yango mbala moko; ozali komona likambo oyo esalemaki, ná oyo ekosalema, mpe bongo na bongo.

<sup>93</sup> Kasi, sikawa, ndoto ezali ntango oyo ozali kolala, mpe biyokeli na yo mitano ezali kosala te, mpe ozali—ozali na kati ya subconscious na yo. Ozali na esika moko boye, mpo, ntango okozonga, okoyeba lisusu esika ozalaki, mpe okomikanisela yango bomoi na yo mobimba. Bomoni? Boye, ezali subconscious na yo. Na bongo mpo na, bomoni . . .

<sup>94</sup> Ndenge Sénateur Upshaw azaláká koloba: “Okoki kozala te oyo ozali te.” Mpe ezali mpenza pene ndenge wana, bomoni.

<sup>95</sup> Na bongo, soki obótámá momóni, sikawa, bomoni, mpo na kosala yango, ba-conscience nyonso mibale esengeli mpenza kozala esika moko; ezali te moko *awa*, ná biyokeli mitano oyo ezali kosala, mosusu *awa*, ntango ozali ya kolala ná biyokeli mitano ezali kosala te. Kasi, bomoni, ntango nyonso mibale, ntango obotami, ezalaka mpenza esika moko, okokende kolala mpongi te. Okoleka longwa na moko kino na mosusu, ndenge—ndenge wana. Okolala mpongi te. Ezalaka mpenza na lolenge ete okolala mpongi te. Mpe okoki komikómisa ndenge wana te.

<sup>96</sup> Boye, “Makabo mpe kobengama, Nzambe nde abongisaka yango liboso.” Ezali—ezali makabo mpe kobengama ya Nzambe, ata “kozanga kobóngola motema,” Biblia elobi bongo. Bomoni? Ebongisámá liboso na kozalisama ya mokili. Bomoni?

<sup>97</sup> Sikawa, sikawa, tomoni ete, nyama, na Daniele, elingaki koloba ete nguya moko ekotelema katikati na bato. Malamu. Mpe—mpe bimónoneli ya Yoane awa, elakisaki mpe ete banguya, bikólo bikotelema. Ndakisa, Etats-Unis emonani na Emoniseli 13, lokola mwana-mpate. Na bongo soki bolingi koyeba, makambo mosusu . . .

Okoloba: “Ee, yango ezali kolobela nguya ya bikólo.”

<sup>98</sup> Etalisaka mpe nguya ya búlee, nyama. Boyebaki yango?

<sup>99</sup> Bótala Rebeka; ntango—ntango mo—mosali ya Abraham, Eliezer. . . Ntango ayaki kozua Rebeka, a. . . Amatisaki ye likoló na kamélá moko oyo ye amelisáká mai. Mpe amatáki likoló na kaméla yango, mpo na kokutana ná mobali na ye ya libala, oyo amonáká naino te. Eloko yango mpenza oyo amelisáká mai, ezalaki eloko yango nde ememaki ye na ndako oyo ekómaki ya ye ná mobali na ye.

<sup>100</sup> Ezali mpe ndenge moko lelo, bomoni. Eloko moko mpenza oyo Lingomba ezali komwangisela mai, oyo ezali Momboto, Momboto ya Liloba. Ezali Liloba yango mpenza nde ezui bomoi mpe ekomema biso epai ya Mobali na biso ya libala, oyo tomóná naino te. Bomoni? Bomoni?

<sup>101</sup> Mpe bótala ndenge ebongi be mpenza. Isaka asiláká kobima na ndako, mpe azalaki na elanga, mosika na ndako na ye, ntango Rebeka amonaki ye.

<sup>102</sup> Mpe Lingomba ekokutana na Klisto na mipepe, na nsima nde Akozonga ná Ye na Ndako, Ndako ya Tata, epai wapi bidandelo bibongisami. Isaka amemaki Rebeka na lolenge moko.

<sup>103</sup> Mpe, bótala, ezalaki bolingo na mbala moko. Oh, la la! Apotaki mbangu mpo na kokutana na mobali na ye.

<sup>104</sup> Mpe lolenge wana nde Lingomba ekokutana ná Klisto, na mipepe, mpe kozala elongo na Ye libela.

<sup>105</sup> Sikawa, na elobeli ya Biblia, Bizàli-na-bomoi oyo bazali banguya. Bótala. Nalingi, sikawa, nalingi ete bótala malamumu.

<sup>106</sup> Zabolo azalaki na banyama na ye minei, ya balángi kílíkili, mpo na kokende na yango. Azalaki na banyama na ye minei. Ezalaki balángi nyonso misato wana nde epesaki lángi moko, yango nde esalaki mpunda ya—ya lángi ya púú; mpunda ya mpembe, mpunda ya motane, mpunda ya moindo. Mpe tomonaki ete moko na moko na yango ezalaki etápe moko ya lotomo na ye, etápe moko ya lingomba ya ebandeli, oyo ekómaki denomination, na Nicée. Lingomba Pantekote ya ebandeli, oyo likoló na yango Molimo Mosanto esopanaki, moke-moke, ezuaki molimo ya motemeli-na-Klisto, esalaki ebongiseli, ebótaki mwa bana basi ya ebongiseli. Abongolaki nguya na ye, mbala misato, mpe asangisaki yango kati na moko, mpe epesaki mpunda ya lángi ya púú. Mpe apesamaki nkombo ya Liwa, mpe yango ememaki ye kino na Seko na seko. Ezali mpenza polele! Sikawa, sikawa bótala, bapesaki ye mpu—mpunda oyo, mpe azali komata yango.

Nzambe, Nzambe mpe, lokola mbala nyonso. . .

<sup>107</sup> Sikawa bótala malamumu. Ntango motemeli-na-Klisto amonanaki mbala ya liboso, amonanaki na nini? Mpunda ya mpembe. Bomoni, ee, asalaki ata mabe moko te, ezalaki kaka

mateyo na kati ya lingomba. Bazalaki na mposa ya boyokani na bondeko. Boyokani na bondeko ezalaka ná Klisto. Kasi bazalaki na mposa ya boyokani na bondeko. Bakokaki mpenza koyikela yango mpiko te, bazalaki na mposa ya kozua . . .

<sup>108</sup> Ee, boyebi, ezali lokola bitonga ya mike-mike oyo ebótamaka na kati ya losambo. Bino, boyebi yango, bino bakengeli. Bomoni? Bango, ndenge balobaka: “Bandeke oyo bakokani.” Kasi soki tobótami mbala mibale, bandeko, oyo wana—oyo wana ezali ezaleli ya kozua te, bomoni. Te. Sikawa, to—to—to . . .

<sup>109</sup> Soki tomoni likambo moko ya mabe na bandeko na biso, tóbondela kaka mpe tókoba kotia yango liboso na Nzambe, mpe tólinga moto yango, kino tokomema ye mpenza Liboso na Nzambe. Bomoni? Ezali lolenge wana nde, lolenge ya kosala mpenza.

<sup>110</sup> Boyebi, Yesu alobaki. “Matiti mabe ekokóta,” mpamba te Yesu alobaki ete ekokota, “kasi bópikola yango te; bokoya kopikola blé ná yango.” Bomoni, “Bótika yango bongo.” Ye nde ako . . . Bótika Ye nde ákabola, ntango ngonga ekoya. Bomoni? Bótika nyonso ékola elongo.

<sup>111</sup> Bótala, wana nyama yango ezalaki kobima, motemeli-na-Klisto azalaki kobima likoló na nyama, nguya na ye.

<sup>112</sup> Oh, naleli yango! Nabandi mpenza komiyoka mosambeli sikawa, bomoni, ekoki kozala bopunjwami. Bótala, ntango motemeli-na-Klisto . . . Oh, bi—bimoniseli yango, Liboso na libúngutulu ya Móto wana oyo ezali kuna kati na chambre! Na lolenge ete . . . Oh, ndeko! Atako namóná Yango, uta bomwana, mbala nyonso oyo epusanaka pembeni na ngai, Esalaka ngai nsomo. Ekómisaka ngai pene na kobúngisa makanisi. Bamesanaka na Yango ata moke te; okokoka te. Ezali na búlee mingi koleka.

<sup>113</sup> Bótala, wana motemeli-na-Klisto azalaki kokende (mbala minei) likoló na banyama na ye ya lotomo, kuna, Nzambe azalaki kotinda Ezàli-na-bomoi moko mpo na kobundisa yango. Bomoni? Sikawa bótala malamumu. Boye, mbala nyonso oyo (nyama yango azalaki kotambola) likoló na mpunda na ye, motemeli-na-Klisto azalaki kotambola na mpunda na ye, likoló na nyama na ye, mpo na kosakola lotomo na ye; Nzambe mpe atindaki Ezali-na-bomoi na Ye, mpe Azalaki likoló na Yango, mpo na kosakola etumba na Ye ná yango.

<sup>114</sup> Sikawa, Makomi elobi: “Ntango moyini akoya lokola mpela, Molimo ya Nzambe akotombola bendéle mpo na kotelemela yango.”

<sup>115</sup> Na bongo ntango moyini abimaki lokola motemeli-na-Klisto, Nzambe atindaki nguya moko boye mpo na kokutana na ye. Na nsima, ntango a . . .

116 Abimaki lisusu, lokola mobuti-mpunda ya motane, lángi mosusu, nguya mosusu, lotomo mosusu; Nzambe atindelaki ye oyo mosusu, mpo na kobundisa yango, mpo Lingomba na Ye ételema ngwi.

117 Atindaki oyo ya misato; lisusu, Nzambe atindaki oyo ya Ye, Ezàli-na-bomoi ya misato eyaki kosangela yango.

118 Atindaki oyo ya minei; Nzambe atindaki oyo ya minei na Ye. Na bongo motemeli-na-Klisto akómaki na nsuka, mpe bileko ya lingomba ekomaki mpe na nsuka, na ntango yango. Bótala malamumu. Sikawa, oh, oyo ezali mpenza malamumu!

119 Sikawa, tomoni ete kobóngwana zábolo yango, ba—banyama minei, ezalaki kotalisa nguya oyo bazalaki komonisa na . . . to nguya oyo azalaki komonisa na mokili, mpe ndenge nyonso wana esukaki likoló na mpunda ya púú, “liwa”.

120 Sikawa tótala banguya ya Nzambe, ya Bizàli-na-bomoi oyo, mpo na kobundisa bango.

121 Ezàli-na-bomoi ya liboso, ya Nzambe, oyo Akendeki kokutana ná motemeli-na-Klisto, molimo ya motemeli-na-Klisto, ntango ezali kaka malakisi. Sikawa bóbosana te, ntango motemeli-na-Klisto atambolaki na mpunda na ebandeli, azalaki na lotomo ya malakisi. Na ebandeli, motemeli-na-Klisto atambolaki na lotomo ya malakisi. Sikawa bótala malamumu oyo akendeki kokutana na ye: nkosi, Nkosi ya libota na Yuda, elingi koloba Liloba. Ntango malakisi na ye ya lokuta ebimaki, Liloba ya solo ekendeki kokutana na ye.

122 Yango wana tozuaki Irénée, ná Polycarpe, ná—ná—ná—ná bato wana, Santu Martin.

123 Ntango motemeli-na-Klisto yango azalaki kotambola ná malakisi na ye ya lokuta, Nzambe atindaki Malakisi na Ye, Liloba, Nkosi ya libota na Yuda, elingi koloba Liloba oyo etalisami kati na Molimo Mosanto. Mpe Molimo Mosanto, oyo azali Liloba, asengelaki komitalisa Ye moko kuna!

124 Yango wana Lingomba ya ebandeli ezalaki na lobiko na nzoto, ná bikamwa, ná bimononeli, mpe nguya, ezali mpo ezalaki Liloba na bomoi, na lolenge ya Nkosi ya libota na Yuda, abimaki mpo na kobundisa yango. Amen! Sikawa bosósoli yango? Ye atindi nguya na ye, motemeli-na-Klisto; Nzambe atindi oyo ya Ye, Liloba. Motemeli-na-Klisto, malakisi ya lokuta; Malakisi ya solo eyaki kokutana na yango, mpo na kobundisa yango! Sikawa, oyo wana ezalaki oyo ya liboso. Sikawa, oyo ezalaki Lingomba ya ebandeli, oyo ya bantoma, nde ekendeki kokutana na ye.

125 Sikawa, nyama ya mibale oyo motemeli-na-Klisto atindaki, ezalaki nyama ya motane, oyo esengelaki ko . . . oyo atambolaki ná yango, esengelaki kolongola kimia (mpe) na mokili, mpo na—mpo na komema etumba.

126 Sikawa, ya mibale oyo ekendeki kobundisa ye, ezalaki Ezàli-na-bomoi ya ngombe. Ngombe elingi koloba mosala makasi, Ezàli-na-bomoi ya bozito.

127 Sikawa, soki tokoki kotelema awa mwa moke. Bótika ngai ná, iyo, bótika ngai ná, kaka mpo bózanga komona yango te, sikawa. Sikawa, likambo yango ekoki kozala na mwa kókoso mpo na bino. Kasi tózua naino Twatila, awa. Bótala malamumu mpo bómona soki e—e—ezali Lingomba oyo ezali kosala mosala makasi te, bomoni.

*Komela na mwanje na lingomba ya Twatila ete;  
Mwana na Njambe, oyo miso na ye ezali lokola epeleli na móto, mpe makolo na ye lokola motako mongengisami,  
alobi boye ete;*

*Nayebi misala na yo, . . .*

128 Bomoni, ekómi likambo ya misala sikawa, bomoni, mpo yango nde akómaki kotambola ná yango.

*. . . ná bolingo na yo, ná mosala na yo, (bomoni, nyonso ekómi kaka . . .) ná kondima na yo, ná . . . mpiko na yo, mpe misala na yo (lisusu, mbala mibale, “misala na yo”), na nsuka míleki misala na yo na liboso.*

129 Bomoni, elakisi ete Eleko ya Twatila, nsima na motemeli-na-Klisto kopikama mpe kokóta na Eleko ya Twatila, Lingomba moke ekokaki lisusu kosala eloko mosusu te, kaka ko—kosala mosala makasi.

130 Mpe likambo mosusu, ngombe ezalaka mpe, ezalaka Nyama ya mbeka. Bomoni? Bapesaki bomoi na bango na bonsomi nyonso, kozanga komibundela mpenza, na bileko ya molili, na mibu nkóto oyo boKatoliko eyángelaki mokili. Bazalaki kaka komipesa, ézala iyo to te. Bazalaki kobánga kokufa te. soki ezali liwa, likambo te. Bakendeki mpe na bakufaki, ata bongo. Mpo na nini? Molimo mpenza ya eleko yango!

131 Yango wana bango, yango wana Irénée, yango wana Polycarpe, Yoane, Polo, bato minene mpe ya nguya wana, bazalaki kobundisa eloko wana!

132 Polo amonáká yango. Alobaki: “Nayebi ete nsima na ngai kokende, banyama ya yawúli bakokóta katikati na bino, bandeko, bakozala koteya malakisi ya lokuta, mpe bakopéngwisa bino.” Bótala mwa mobange ntoma wana, atelemaki wana ná elongi ya eyongi, bilembo ya fimbo na mokongo na ye, ná mpisoli na miso. Kasi miso na ye ekokaki komona mosika koleka oyo ya bango. . . koleka télescope oyo bazali kotambwisa kuna, oyo bakoki komona na yango kino na ba-année-lumière nkóto mokama na ntuku mibale. Ye akokaki komona kino na Seko-na-seko. Azalaki wana. Mpe alobaki yango liboso, mpe alobaki ete yango nde likambo oyo ekosalema.

Mpe alobelaki mpe eleko mosusu oyo ekolanda. Sikawa bótala, azalaki wana.

<sup>133</sup> Nzela, nsima na ye, Santu Yoane abikaki ntango molai koleka. Ntango Santu Yoane azalaki koluka kozua Mikanda ya bulee nyonso, apakolamaki na Molimo Mosanto, mpo na kosangisa yango mpe kosala Biblia, bokonzi ya Roma ekangaki ye mpe etiaki ye na esanga ya Patamo. Azalaki na esanga ya Patamo mpo na Liloba na Nzambe. Polycarpe azalaki kosunga ye kolimbola Yango.

<sup>134</sup> Natángaki, mokolo mosusu mosusu wana, mokanda oyo Maria ye moko akomelaki Polycarpe. Azalaki kopamela ye. . . kopamela te. Kasi azalaki nde kokumisa ye mpo azalaki mobali ya mpiko, oyo akokaki kolakisa mpe koyamba malakisi ya Yesu Klisto, Oyo ye abotaki, longwa na Nzambe. Mokanda ya Maria ye moko, oyo akomelaki Polycarpe.

<sup>135</sup> Polycarpe apesamaki lokola bilei epai ya bankosi, boyebi. Te, batumbáki ye. Ntango e—esilaki mpenza koleka mpo báfungola nkosi na libanda ya masano, na bongo babukaki kikóso ya ndako moko ya kala ya esika ya kosukola, mpe batiaki ye na kati ya—na kati ya libanda ya masano mpe—mpe batumbáki ye.

<sup>136</sup> Ntango azalaki kokende kuna, azalaki kotámbola, angumbi motó. Kapitene ya Roma alobaki: “Okómi mobange, mpe ozali na lokumu malamumu. Mpo na nini te koboya likambo yango?”

<sup>137</sup> Akobaki kaka kotala na Likoló. Mpe Mongongo moko elobaki longwa na esika moko boye. Bazalaki kosósola te epai wapi. Elobaki: “Polycarpe, kobanga te. Nazali elongo ná yo.” Ah-ha. Mpo na nini? Atelemaki ngwi ná Liloba wana.

<sup>138</sup> Ntango babandaki kotondisa mabaya likoló na ye, mpo na kotumba ye, mizíki moko ya Lola ekitaki. Mpe—mpe Banje bazalaki koyemba banzembo yango esika moko boye. Abetaki miso ata mbala moko te, liboso na batioli.

<sup>139</sup> Oyo wana nde mibali ya mpiko. Oyo wana nde mibali oyo bazongaka nsima te. Ba-martyr oyo baniokwamaki mingi nsomo na kati ya bileko, kuna. Kasi bazalaki banani? Bazalaki na nsé ya mpémela, Molimo ya Nzambe, nguya. Ngai. . .

<sup>140</sup> Bóbosana yango te, lingomba. Mpe bino bandeko oyo bozali koyoka bande, nalingi ete bótala likambo yango malamumu. Ndenge nini bato bakokaki kosala eloko mosusu, libanda na nguya ya Nzambe oyo eutaki kopesamela bango? Nakotia engóngóló oyo awa, mpo na kotalisa yango. Soki Nzambe atindi Molimo moko katikati na bango, yango nde eloko bobele moko oyo bakoki kosala na nzela na yango: ezali Molimo oyo esalaka katikati na bango. Sikawa tokotalisa bino polele, na nzela na histoire ya Lingomba, mpe na nzela na—na bofungwami ya Bilembo, ná banguya oyo etindamaki; bokomona ete Lingomba ezalaki mpenza kotosa e—epakolami, mpe bakokaki kosala eloko mosusu te.

141 Sikawa, ya liboso ezalaki nkosi wana oyo engulumaki, Liloba ya peto wana, oyo esangisami te.

142 Ya mibale, na Twatila, ezalaki ngombe. Mpe Ezalaki mo—mosala makasi. . . Ezàli-na-bomoi ya mosala makasi. Bólimbisa ngai. Ezalaki mpe Ezàli-na-bomoi ya mbeka. Yango ezalaki mpenza Lingomba moke wana te? Roma efandaki mpenza, kuna, mibu nkóto mobimba, na bileko ya molili, mpe bató nyonso oyo bazalaki koloba ete bazali bato ya lingomba ya Roma te, bazalaki kobomama mbala moko. Mpe basengelaki kosala mosala makasi, kokende longwa na esika moko kino na esika mosusu.

143 Bino ba-Franc-maçon, nakobenda bokebi na bino. Boyebi lisusu elembo ya ekulusu? Sikawa bo—boyebi eloko oyo nagi nazolobela.

144 Sikawa bótala malamumu. Sikawa, soki bo—soki botali malamumu, yango nde esalaki ete Biblia wana ébombama mpe ébatelama. Bomoni? Basengelaki kosala mosala makasi, bamoko na bamosusu. Yango mpenza, ngombe yango. Mpe ntango ngonga ekokaki. . . Totángaki yango lobi na mpokwa. Bomoni, ntango eloko yango ebimaki, ntango ya mbeka ekokaki, mpe basengelaki kolekela wana.

Alobaki: “Kobebisa vinyo ná Mafuta te.”

145 Basálaki eloko nini? Bango moko bazalaki kondima kokende kuna mpe kokufa. Ezalaki kotungisa bango te, mpo Molimo ya Lingomba na ntango wana ezalaki ya mbeka, ya mosala makasi. Mpe bazalaki kopusana, bango moko mpenza, wana bapakolami na Molimo ya solo ya Nzambe mpo na eleko wana, mpe bazalaki kokufa lokola bilombe, mbeka; bato nkóto na nkóto, milió ntuku motoba na mwambe nde motángo oyo ekomámá na buku.

146 Ngombe, mbeka! Oh, la la! Bosósoli yango? [Losambo balobi: “Amen.”—Mok.] Malamumu. Malamumu. Sikawa, mbeka, kaka na eleko wana nde mosala ezalaki makasi bongo, mpo na kobundisa kotelemela monene oyo esalemaki na mobu nkóto moko wana.

147 Sikawa, nyama ya misato oyo eutaki epai ya zabolo, ezalaki mpunda ya moindo. Bomoni?

148 Sikawa, Ezàli-na-bomoi ya misato oyo ebimaki, nguya oyo eutaki na Nzambe, mpo na kobundisa ye, mpo na kobundisa banguya ya mpunda ya moindo, ezalaki moto, na makoki ná mayele mingi, ná bwanya ya Nzambe. Boyebi, moto azali na mayele mingi koleka banyama nyonso. Bomoni? Azali na mayele mingi koleka, mpo akoki kolekela bango ntango nyonso, mingimingi. Azali na makoki, na mayele mabe. Bomoni? Mpe a . . .

149 E—eleko, nsima na eleko ya molili, eleko oyo elandaki eleko ya molili; sikawa, na ngámbo mosusu oyo, ntango mpunda ya moindo ezalaki kotambola, ntango bazalaki kofutisa mbongo mpo na bambeka na—na—na—na bango ná nyonso oyo bazalaki

kosala. Mpe mbongo ekómaki mpenza... Oh, boyebi ndenge ezalaki.

<sup>150</sup> Sikawa, eloko elandi, oyo ebimaki mpo na kobundisa yango, ezali Ezàli-na-bomoi ná elongi ya moto; azalaki na mayele mingi, mayele ya kelasi, mayele mabe, bolamu, apakolamaki ná Molimo ya mokolo yango. Bomoni yango? Sikawa, akendeki kobundisa ye, ná mayele ya kosala ya bwanya ya Nzambe elongo ná ye. Wana ezalaki eleko ya réforme, Martin Luther, John Wesley, mpe bongo na bongo. Bomoni, ekómaki réforme. Zwingli, ná, oh, bamosusu nyonso, Knox, Calvin, ná bamosusu nyonso, bomoni, babimaki. Ezalaki mayele ya kosala likambo. Sikawa, bótala malamau, kobanda na eleko ya molili mpenza, kobanda na réforme, na ngámbo oyo, bótala malamau, ezalaki mayele ya moto.

<sup>151</sup> Soki bokoki kofungola maninísa mwa moke! Nabanzi ete bato babandi koyoka mwa molunge, iyo, ntango mosusu, baoyo bafandi kuna. Soki bokoki kofungola maninísa mwa moke kaka! Mpamba te, nayebi ete soki ngai natelemi awa koteyáká, nabandi koyoka molunge, nayebi ete bino kuna mpe bosengeli koyoka ndenge moko.

<sup>152</sup> Ee, bótala, ezalaki ya mayele ya moto. Sikawa, bososoli?

<sup>153</sup> Nyama ya misato oyo Satana atindaki, akómaki mpe na mayele mabe. Bótala malamau: “Kopo moko ya blé denali moko. Kopo misato ya loso denali moko.” Bomoni? Oh, la la! Bomoni? Mayele mabe ya kosala mbongo, mpo na kozua wolo ya mokili mobimba, mpe bozwi, abótolaki yango. Esalemaki mpenza mpo na kokokisa yango. Yango nde oyo ebandaki kofutisa bato mbongo mpo na mabondeli. Mpe mpo na... Basalaki esika oyo babéngaka epóngelo, mpe bakómaki kobondela mpo na kobimisa bankoko na bango kuna. Mpe, oh, osengelaki kotikela bato biloko na yo nsima na liwa, ná nyonso wana, lopango na yo. Lingomba ná, ezalaki nde letá, ezalaki ndenge moko, mpe lingomba nde esengelaki kozua lopango na yo.

<sup>154</sup> Mpe bozali komona te ete ba-evangeliste mosusu ya lelo, kino lelo, bazali na epakweli moko wana likoló na bango? Bapesaka mitindo ete mibange bápesa mbongo na bango mpe, nsima na liwa, bátika bandako na bango mpo na makambo moko boye. Oh, frère, na—nalingi kokende na oyo wana te, bomoni. Kasi sikawa, nakokangama na likambo oyo; nabwakaka miso na nsima mpo náyeba epai nazokende. Sikawa bótala, bato yango, wana etali bango. Wana etali bango. Yango—yango—yango etali ngai ata na eloko moko te. Ngai nazali kaka na mokumba ya likambo Oyo awa.

<sup>155</sup> Sikawa bótala, e—Ezàli-na-bomoi oyo eyaki kobundisa yango, sikawa, ezalaki moto. Mpe biso nyonso toyebi ete Ezàli-na-bomoi oyo, moto yango, nguya ya moto oyo, ná mayele na ye

ya bongó, asósolaki ete kasher oyo Martin Luther asimbaki na loboko, ntango azalaki komata bibuteli wana . . .

156 Bazalaki koloba: “*Oyo ezali Makila ya Yesu Klisto. Oyo ezali nzoto ya Yesu Klisto.*”

157 Luther abwákaki yango na nsé, mpe alobaki: “Ezali lipa ná vinyo. Ezali nzoto ya Klisto te; mpamba te, yango ematáki na likoló, mpe efandi na loboko ya mobali ya Nzambe, mpe ezali kolobela biso.” Bomoni, bwanya; bomoni, moto.

158 Mpe ntango John Wesley ayaki, nsima na Zwingli koya, ná Calvin . . .

159 Mpe bamemaki lingomba na mosanda ya kobatelama, na lolenge ete bazalaki lisusu na mposa ya ba-kolamuka te. “Nyonso oyo ekosalema, ekosalema.” Ezalaki kosuka wana. Mpe bakómaki kobika bomoi ya ndenge nyonso. Lingomba ya Luther esili kobima mpenza libanda na nzela, ná lingomba Anglicane! Oh, la la! Ekólo mobimba esili kobeba, kaka ndenge ezali sikawa. Mangomba esilaki na yango kobima libanda na nzela. Ntango Roi Henri wa—wa VIII azuaki bokonzi na Angleterre, nsima na Marie mosopi makila, ná makambo nyonso oyo esalemaki. Mpe, na ntango yango, lingomba etondaki na mobulu mpe na mabe. Mingi bazalaki koloba ete bazali Baklisto, kasi kobikáká ná basi minei to mitano, to kosaláká nyonso oyo balingaki kosala, mpe kosala bisálélé, mpe kobika bomoi ya mbindo.

160 John Wesley azalaki koyekola Makomi mpe kotala Yango malamumu, emonisamelaki ye ete Makila na Yesu Klisto nde ebulisaka mondimi. Mpe ete moto . . . asengeli te . . . Nsima na yango asalaki nini? Abandaki réforme mosusu. Abikisaki mokili na ntango na ye, ndenge Luther autaki kosala. Bomoni? Ezalaki nini? Moto wana, nguya ya Ezàli-na-bomoi, ebimaki.

161 Apesaki moto bwanya, ya kososola ete likambo yango ezali lokuta. “Wana ezali Makila ya Yesu Klisto te. Wana ezali nzo—nzoto ya Yesu Klisto te. Etalisaka nde nzoto yango.” Bomoni?

162 Ezali likambo oyo ba-Katoliko ná ba-Protestant babéndanaka kino lelo. Yango nde likambo bobele moko oyo bazokoka kosangana te sikawa mpenza. Makambo mosusu nyonso, bakoki kosangana na yango, longola kaka oyo wana; na makita wana oyo bazosala. Bótala sikawa. Kasi, na likambo oyo, kasi ba—bakokaka kosangana te na likambo wana. Bomoni?

163 Bamoko balobaka: “Ezali Makila, mpe,” balobaka, “ezali Makila mpenza; ete sánzó azali na nguya ya kobóngola lipa na nzoto mpenza ya Klisto.” Yango wana mwa tabernacle wana ezalaka na kati ya—ya—ya ndakonzambe, boyebi. Yango wana basalaka elembo ya ekulusu ná makambo ya ndenge na ndenge ya bapakano, ntango balekaka pembeni, boyebi, bangúmbamaka, batómbolaka bikoti, mpe bongo na bongo. Oyo wana ezalaka mpo na ndakonzambe te; basalaka yango mpo na

kasher oyo ezalaka na kati ya—ya tabernacle. Mpe bótala ndenge Satana asalaki yango na mayele mabe!

<sup>164</sup> Kasi, bomoni, na ntango yango, na ntango ya ezàli ya moto, bomoni, Nzambe atiaki Molimo ya bwanya likoló na moto, mpo ásosola ete ezali lokuta. Sikawa, wana ezalaki mpo na kobundisa nyama ya misato, oyo abebisaki lingomba mpenza, ntango azalaki kotambola na mpunda, ezalaki nsomo. Ba-réformateur yango basalaki nini na ntango yango, bango na eleko ya ba-reformateur? Babimisaki Lingomba na milúlú ya bopakano ya kosambela bikeko, mpe bazongisaki lisusu Yango epai ya Nzambe. Bomoni? Yango wana Ezàli-na-bomoi yango abimaki, ná mayele wana ya kosala ya moto, mobuti-mpunda yango, mpo na kosala yango.

<sup>165</sup> Sikawa, kasi, bótanga sikawa molongo ya 3 mpe. . . to, Emoniseli 3:2, mwa moke. Sikawa, nakómáki yango awa na ntina moko. Sikawa oyo ezali eleko ya Luther, na eleko ya ba-réformateur, Emoniseli 3:2.

<sup>166</sup> Oyo basalaki ezali ete, bakómaki ebongiseli. Kaka ntango Luther abandáki lingomba na ye, bakómisaki yango ebongiseli. Malamu, ndenge moko Wesley asalaki. Ndenge moko mpo na ba-Pantekotiste basalaki, bakómi ebongiseli. Basali nini? Bakamati systeme moko oyo bautaki kobima na yango. Bomoni?

<sup>167</sup> Sikawa bótala yango malamumu, na Emoniseli, ezali kolobela lingomba ya Salade oyo. “Komela mwanje na lingomba,” ezali molongo ya 1, ya solo. Bomoni? Malamumu.

*Ókengela, mpe pesa nguya na oyo etikali,*

<sup>168</sup> Elingi koloba: “Liloba oyo bateyaki yo,” bomoni, “makambo oyo etikali.”

*. . . oyo elingi kokufa: . . .*

<sup>169</sup> Asili kobelemu mpo na kobanda lisusu ebongiseli kaka lokola lingomba Katoliko, oyo abimaki na yango. Bomoni?

*. . . mpo ete najui misala na yo ete esili kokoka na miso na Njambe na ngai te.*

<sup>170</sup> Yango mpenza. Yango nde. . . Ye wana, azongi lisusu kuna. Bomoni te mpo na nini ba-système ya bibongiseli ezalaka lokuta? Nani nde abandáki yango? Ezali Nzambe? Ezali bantoma? Lingomba Katoliko ya Roma nde abanadaki yango. Sikawa, historien moko áloba ete ezali bongo te. Ekoki kosalema te. Bazali, balobaka ete bango nde lingomba mama, mpe ezali bongo. Kasi bakómisi yango ebongiseli, mpe basali système moko, ná moto moko likoló na yango. Kasi biso totiaki moto moko te, lokola bango; totii nde likita mobimba ya bato, totii bango esika moko, na bongo, bokoti mpenza na mobúlungano. Ya solo. Eloko nini likita ekosala mpenza, ata bongo?

<sup>171</sup> Ezali kaka lokola, biso tokanisaka ete démocratie ezali malamumu. Ngai mpe nandimaka bongo, kasi ekotikálá kotambola

malamu te. Ekokoka te. Ná etonga ya ba-Ricky oyo bazali koyangela yango awa, ndenge nini ekoki kotambola malamumu? Okokoka te. Bótala, eloko ya solosolo ezalaki ya kozala na mokonzi oyo abángaka Nzambe.

172 Bótala Ezàli-na-bomoi yango, Ezàli-na-bomoi ya misato, sikawa, ezalaki mayele ya kosala ya moto. Mpe azalaki etaliseli ya ba-réformateur oyo bayaki.

173 Longwa na ekeko yango, ya kolia, balobaka: “Oyo nde lipa yango.” “Oyo nde vinyo yango.” Bomoni, kino lelo, motemeli-na-Klisto azalaka elembetele ya Boklisto. Asengeli kozala bongo, mpo azali “kotelemela,” bomoni. Na bongo, soki asengeli kotelemela eloko moko . . .

174 Sikawa, soki ayei koloba: “Oh, ngai nazali Buddhiste.” Ee, ezali na ntina moko te. Bango nyonso basalaka yango. Oyo wana azali kaka mopagano, mpo na kobanda.

175 Kasi motemeli-na-Klisto azali na mayele mabe. Azali na makambo ya ndenge na ndenge oyo etalisaka Boklisto kuna. Kasi, amemaka yango na ngámbo mosusu, akotisaka eloko oyo etelemelaka Mateyo na Yango ya ebandeli. Bomoni, yango nde ekomisaka ye motemeli-na-Klisto. Bomoni?

176 Boye, ba-réformateur, ntango Ezàli-na-bomoi yango abimaki na lolenge ya—ya moto, mpo na kobundisa yango!

177 Sikawa, bóbosana yango te, lisanga! Bóbosana yango te! Bomoni? Bómíkaniselaka Yango, mikolo nyonso ya bomoi na bino! Bomoni? Oyo nde Bizàli-na-bomoi yango. Ezali YANGO ELOBI NKOLO. Bomoni?

Bótala, losambo ya bikeko nde ekotisaki . . .

178 Ezàli-na-bomoi ya moto abimaki ná nguya ya Nzambe, ná bwanya oyo Nzambe apesaki ye, mpe abimisaki Lingomba na losambo ya bikeko, azongisaki Yango epai ya Nzambe. Kasi na . . .

179 Tomoni ete, na eleko ya lingomba moko wana, ntango babandáki kokóma denomination, kosala likambo moko oyo basalaki na ebandeli, oyo Roma asalaki, sikawa akobota bana basi na lingomba yango. Mpe alobi nini?

180 Alobaki: “Lokola okómi . . . Namoni yo malamumu be te. Osengeli kolendisa mwa makasi oyo otikali na yango.” Sikawa bóyoka ndenge Azali kokebisa bango, na Emoniseli lisusu, 3:3. Tózua . . . Ee, nabanzi ete natángaki yango, kala mingi te.

*Na bongo kanisa lisusu liteyo liyambaki yo mpe liyokaki yo, mpe batela yango mpe bongola motema.*

181 Kaka, na elobeli mosusu: “Kobósana te ete outaki na libebi monene wana.” Bomoni? Mpe bótala awa.

*...Soko nde okokengela te, Nakoya lokola moyibi,  
(ah-ha), mpe okoyeba...mpe okoyeba te soko  
nakobimela yo ntango nini.*

<sup>182</sup> Mpe bongo na bongo, Akolongola etemelo na mwinda, bomoni. Boye, ezali yango. Ezali nini? Pole ya Lingomba.

<sup>183</sup> Mpe azongaki mpenza na kati ya système yango, ya bibongiseli ya molili ya bapakano, oyo abimáká kati na yango, mpe atikali kuna kino lelo, ná bato ya mitema sembo oyo bazali kokanisa ete yango nde Solo, bakómi mpenza lokola ba-Katoliko. Mpe ba-Protestant batiolaka ba-Katoliko; nzokande bazali kaka ndenge moko, ndenge moko mpenza, kokokana na Liloba. Bwanya ya moto!

<sup>184</sup> Sikawa bótala. Oh, nalingaka Yango mingi! Bóyoka Ye sikawa kokebisa bango. Sikawa, sikawa biso. . . Bondimi yango malam mpenza, moko na moko na bino? Sikawa, soki te, bókómela ngai motuna. Bizàli-na-bomoi yango batalisami mpenza na eleko moko na moko, ndenge Biblia etalisaki bango awa. Yango mpenza nde basalaki kuna. Histoire etalisaka makambo oyo basalaki. Totali awa mpe tomoni oyo basalaki.

<sup>185</sup> Mpe awa, Bizàli-na-bomoi yango, liboso, na—na—nayebaki yango ata moke te. Nafandaki kaka wana. Nazalaki mpenza komona yango kotambola mpenza wana, kaka ndene bozali kotala ngai. Bomoni? Mpe esengeli kozala solo, mpo elóngobani mpenza awa na Biblia. Boye, ndenge nini okosala eloko mosusu, libanda na koloba ete ezali ya solo? Bótala.

<sup>186</sup> Sikawa, Ezàli-na-bomoi ya minei, oyo atindamaki mpo na kobundisa motemeli-na-Klisto, na Ezàli-na-bomoi ya nsuka oyo. Boléngelami? Ezàli-na-bomoi ya nsuka oyo atindamaki, to nguya ya nsuka, mpo na kobundisa motemeli-na-Klisto oyo azalaki kotelemela Malakisi ya Nzambe, motemeli-na-Klisto, ezalaki mpongo. Bomoni? Ezali-na-bomoi ya minei ezalaki mpongo. Sikawa, bóyekola bileko, bóyekola Makomi. Ezali mpongo! Mpe na Biblia, eleko ya nsuka ezalaki eleko ya mpongo. Mpe Nzambe akokanisaka mpongo na basakoli na Ye. Bomoni? Yango. . . Sikawa bótala malam. Eleko ya nsuka, eleko ya mpongo, mo—momónisi ya Liloba ya solo. Bomoni?

<sup>187</sup> Liboso Nzambe ábanda mosala, ndenge Asalaki na mikolo ya Noa, Atindaki mpongo moko. Ntango Abimisaki Yisraele, mpe mapinga ya Falo babelemaki mpo na kolanda bango, Atindaki mpongo moko. Mbala nyonso, Atindaka mpongo na nsuka, na nsuka na yango.

<sup>188</sup> Mpe awa, Atindi lisusu mpongo moko. Elongobani mpenza na Liloba. Boye, ndenge nini okoki kokómisa yango eloko mosusu? Atindaka mpongo, (mpo na nini?) momónisi ya Solo oyo ezalaki kobunga na kati ya bileko.

<sup>189</sup> Boye, ndenge nini ngo—ngombe, to mo—to moto, to Ezàli-na-bomoi mosusu oyo abimaki, ndenge nini ekokaki komonissama

liboso mpongo áya? Bazalaki na bisika na bango; bazalaki Bizàli-na-bomoi ya bulee, oyo batindamaki, kaka lokola bamosusu nyonso.

<sup>190</sup> Nkosi nde azalaki oyo ya ebandeli. Na esika yango nde motemeli-na-Klisto abandaki e—etumba.

<sup>191</sup> Na nsima atelemisaki nguya mosusu; Atindaki nguya moko mpo na kobundisa yango.

<sup>192</sup> Na nsima atelemisaki nguya mosusu; Atindaki nguya mosusu mpo na kobundisa yango.

<sup>193</sup> Na bongo na nguya ya nsuka, Atindi mpongo na mokili, “mpo na kozongisa bana na Kondima ya ebandeli, ya batata na bango.” Eleko ya mpongo! Bongo, soki botali malamumu, Bizàli-na-bomoi ezali lisusu te. Esili. Wand nde nsuka. Sikawa, soki bokoki kozua Emoniseli 10:1,7. Nazalaki kolobela yango. Bómikanisela, na eleko ya motindami ya nsuka, bomoni, likambo nini esengelaki kosalema? “Mabombami nyonso ya Nzambe ekomonisama.” Mpongo! Amen!

<sup>194</sup> Sikawa bomoni banyama minei oyo bazalaki kotambola na mpunda. Ezalaki mpenza bongo. Bondimi yango? Sikawa, awa nde eleko moko na moko, to nguya moko na moko oyo ezalaki kotambola nsima na yango. Mpe ezali na Likomi oyo etalisi makambo oyo mobuti-mpunda ya moyini asalaki. Yango esili komonisama na kati ya Bilembo oyo. Lisusu, emonisami sikawa ete Ezàli-na-bomoi moko na moko, nguya oyo Nzambe azalaki kotinda, mpo na kobundisa yango, elongobani mpenza-mpenza na likambo moko moko, kino na ntango ya mpongo. Sikawa, soki tozali na ntango ya nsuka, mpongo moko akoya, ya solo, mpo na yango. Sikawa, bóbosana yango te.

<sup>195</sup> Sikawa, na mikolo oyo nkosi ayaki, Liloba ya ebandeli, pene na moto moko kati na mokama nde bayokaki nkosi yango.

<sup>196</sup> Na mikolo oyo ngombe a—ayaki, bato moke mpenza nde bayokaki nsango ya ngombe.

<sup>197</sup> Na mikolo oyo moto a—ayaki, asalaki katikati na bato, bomoni, boye azalaki na mayele mingi. Abimisaki mwa etonga moko.

<sup>198</sup> Kasi basalaki nini? Satana amonaki yango, na bongo azongisi bango mpe abalisi bango na yango.

<sup>199</sup> Mpe bomikanisela, sukasuka ntango mpongo akoya, moto moko kati na mokama ya moko kati na mokama nde bakoyoka. Ezali eleko ya mpongo. Bobosana te, ezali babuti mpunda mosusu nyonso. . . Na bongo, ata Yesu alobáki liboso ete: “Soki Áwélisaki Boyei na Ye te, ata moto moko te akobikisama mpo na Konétolama.” Wana nde Likomi yango? Na bongo, bomoni epai tokómi, ndeko mobali mpe ndeko mwasi, boye te? Bomoni epai tokómi?

200 E Nzambe, nazali na esengo monene, na—na—nayebi te eloko ya kosala! Kasi na . . . Natelemi awa bobele mpo na ko—koloba. Ngai mpe nazali kati ya likambo. Ngai, nzali moko na bino. Bomoni, ngai, Etali ngai. Nazali na libota. Mpe nazali na bandeko mibali ná bandeko basi oyo nalingaka. Mpe Nzambe ya Likoló, ná boboto mingi, áya ko—komonisa likambo yango, Ye moko . . . na bimónoneli oyo etalisami polele na mibu ntuku misato, ete ezali Solo. Tokómi wana. Tokómi . . . Tosili kokóma. Esili. Boluki-luki ya science etalisi Yango polele. Bokokisami ya Liloba etalisi Yango polele. Mpe tokómi wana! Mpe Emoniseli oyo euti na Nzambe, mpe Ezali Solo!

201 Bosósoli likambo moko? [Losambo balobi: “Amen.”—Mok.] Nazalaki komituna soki bozalaki kososola. Bomoni? Iyo, misie. Boye, ntango mosusu nakozala na ntina te ya koyebisa bino yango, mokolo ya Lomingo. Bótala. Bótala. Kitoko mingi! Sikawa, sikawa, bótala sikawa.

202 Na bongo, kokokana na ntango oyo Nzambe a—alingaki kosikola mokili liboso na mpela monene, Atindaki mpongo.

Mpe ntango Alingaki kosikola Yisraele, Atindaki mpongo.

203 Bondimi ete ntango, ata mpo na Yoane, na esanga ya Patamo, Nsango yango ebongaki be mpenza na lolenge ete Akokaki kopesa Yango na Mwanje te? Boyebi, mwanje azali motindami. Kasi boyebi ete motindami azalaki mosakoli? Bondimi yango? Tótalisa yango polele. Emoniseli 22, tótala soki ezalaki mpongo. Iyo. Bomoni, azalaki . . . Ya solo, azalaki mwanje, azali motindami, kasi ezalaki mosakoli moko nde amonisaki ye Buku mobimba ya Emoniseli.

204 Emoniseli, mokapo ya 22, molongo ya 19, nabanzi ete ezali bongo, soki nakomaki yango awa . . . 22:19, nakoki kozala na libunga. Te. [Moto moko alobi: “Ezali 22:9, ntango mosusu.”—Mok.] 22:9, ezali yango. Nazalaki kotala 22:9. Ya solo. Oh, iyo, awa.

*Alobaki na ngai ete, Kosala yango te: ngai najali moko ya baombo moninga na yo, mpe na bandeko na yo basakoli, . . .*

205 Bótala malamau oyo Yoane amonaki awa.

*. . . Ngai Yoane moto namonaki makambo oyo mpe nayokaki yango.*

206 Sikawa azosukisa. Oyo nde mokapo ya nsuka.

*. . . Wana eyoki ngai . . . mpe emoni ngai, nakwei kosambela liboso na makolo na mwanje oyo atalisaki makambo oyo, oyo atalisaki ngai makambo oyo.*

207 Mpe “ye,” nsima na yango, “mwanje,” bomoni.

*Nsima na yango ye alobi na ngai ete, Komeka kosala yango te: . . .*

208 Mosakoli moko te ya solo akolinga ete básambela ye, to motindami ata moko te, bomoni. Ezali bobele mpo na Nzambe.

*Bongo ye alobaki na ngai ete, Komeka kosala yango te: ngai najali moombo moringa na yo, mpe na bandeko na yo basakoli, na bango bakotosaka maloba na mokanda oyo: sámbela Njambe.*

209 Bomoni? Sikawa, Buku yango ezalaki na motuya mingi, na lolenge ete, Ezali Liloba na Nzambe. Sikawa bótala malamumu. Mpe ntango Liloba na Nzambe epesami, Esengeli kopesama na mosakoli, mpo epai na ye nde Liloba na Nzambe eyaka.

210 Nazalaki kozela ete motuna moko éyela ngai, na ntina na yango, na kati ya—ya engóngóló oyo. Nakanisaki ete náyanola na yango mwa moke liboso, boyebi. Namoni lokola motuna moko ya ndenge wana ezali na kati kuna, esili. Na—nakanisaki ete náyanola na yango, bomoni. Bomoni?

211 Liloba na Nzambe moko na moko esili kopesama. Biblia ebongolaka lolenge ya makambo te, ata moke te, bomoni. Ezalaka kaka ndenge moko. Esengeli koya epai ya momóni oyo tozozela boyei na ye, sikawa bótala, Emoniseli 10:1, 7.

212 Sikawa tótánga lisusu molongo ya—ya 9. Sikawa toko. . . to. . . Sikawa, liboso tózua molongo yango, nalingi kosenga bino likambo moko.

213 Liboso tóleka na Bilembo yango, bozali komona malamumu be mpenza? Sikawa bóbosana te, banguya mosusu ezali kobima te, nsima na mpongo yango, bomoni, ata moke te. Mbala nyonso oyo motemeli-na-Klisto azalaki kotinda eloko moko, Nzambe azalaki kotinda nguya moko. Ntango motemeli-na-Klisto atindaki nguya mosusu; Nzambe mpe atindaki eloko moko mpo na kobundisa yango. Na nsima atindaki nguya mosusu; Nzambe mpe atindaki eloko moko mpo na kobundisa yango. Bomoni? Bongo, ntango Akómaki na mpongo, oyo wana ezalaki Liloba na Ye, ezongaki ndenge Ezalaki na ebandeli.

214 Sikawa bótala malamumu. Mosakoli oyo tozozela boyei na ye, akozala moto oyo apakolami na—na Molimo ya Eliya, boye te? Akozala Eliya te, na ntembe te. Kasi akozala moto moko ya ndenge wana, nde akoya. Mpe lotomo na ye mpenza etindami, mpo na kozongisa libota oyo ekweyaki na mobúlungano nyonso ya ba-dénomination, kozongisa yango na Kondima ya batata ya ebandeli. Sikawa, soki yango ekangisi Biblia wana elongo te, na—nayebi te eloko nini ekosala yango. Na—na—nakoki koloba lisusu koleka te na ntina na yango, mpo ezali yango. Bokómi wana mpenza. Ezali Solo. Soki bolongoli eloko moko kati na yango, bobebisi yango. Bomoni? Boye, esengeli bobele kozala ndenge wana.

215 Sikawa bótala, sikawa, na molongo ya 9, “Milimo na nsé ya etumbelo.” Sikawa, awa nde esika oyo bato mosusu bakondimana na ngai mpenza te. Kasi bóyoka mpenza na

bokebi, kaka mwa miniti. Mpe... Bomoni? Ngai mpe nazalaki kokanisa bongo, kasi eyaki lolenge wana te. Tozali na... Nazalaki ntango nyonso kokanisa ete milimo oyo ezalaki na nsé ya etumbelo ezalaki ba—ba—ba—martyr ya Lingomba ya ebandeli. Mpe nandimisami ete, ee, Dr. Uriah Smith, ná bango nyonso, balobaka ete ezali bongo. Bomoni? Kasi, ngai moko mpe nazalaki kokanisa bongo. Kasi ntango Molimo Mosanto atalisaki emononeli na yango, ezalaki bongo te; ezali milimo yango te.

Sikawa, sikawa bokoloba: “Ee, sikawa, nayebi na ngai te na ntina na oyo wana.”

<sup>216</sup> Ee, sikawa, bózela naino, tokotala. Bótala. Baoyo bazali milimo ya—ya Lingomba Mwasi na libala te, ata moke te. Tozalaki kokanisa ete bazalaki Lingomba Mwasi na libala oyo bazalaki kozela kuna, milimo na nsé ya etumbelo, bomoni, oyo bazalaki koganga: “Kino ntango nini, Nkolo, kino ntango nini?” Bótika nátánga yango lisusu sikawa, mpo tósosola yango malamumu.

*Wana ekangolaki ye elembo na mitano, namonaki na nsé na etumbelo milimo na bango basili kobomama mpo na liloba na Njambe, mpe mpo na litatoli litatolaki bango:*

<sup>217</sup> Bomoni, “Liloba na Nzambe mpe litatoli oyo bango kopesaki.” Sikawa, bó—bólóngwa wana te. Bózela moke, bomoni.

*Bagáangi... Ntango nini, ... Nkolo, ntango nini?... (bomoni?)... mosanto mpe na solo, oko... okosám-bisa te mpo na kobukanisa bango bafandi na mokili na ntina na makila na biso?*

*Elamba mpembe epesamaki na bango moko moko; mpe elobami na bango ete naino mwa ntango moke bakopema, kino ekokoka motuya na baninga na bango baombo, ná—ná... bandeko na bango baoyo bakobomama lokola esili bango mpenja kobomama.*

<sup>218</sup> Sikawa, mpo bango, na ntango yango, soki botali malamumu, ntango Elembo ya Mitano oyo ezali kofungwama, bomoni, Lingomba esili kokende. Milimo na nsé, ekoki kozala li—Lingomba ya ebandeli te.

<sup>219</sup> Sikawa, sikawa, nalombi bino ete bóyoka na bokebi mpenza, mpo ezali likambo moko ya ntemb-... ntembe monene te, na bongo, nasengi na bino ete bóyoka na bokebi mpenza sikawa. Mpe bozali na nkasa, ná biloko ya kokomela. Sikawa, nalingi ete bótala malamumu.

<sup>220</sup> Sikawa, baoyo bakoki kozala milimo wana te. Mpamba te, mi—milimo ya—ya bayengebene, oyo babomamaki, ná bayengebene, Lingomba, Mwasi na libala, basilaki konétolama, na bongo, bakozala na nsé ya etumbelo te. Bakozala na Nkembo,

elongo ná Mwasi na libala. Sikawa bótala malamumu. Mpamba te, basilaki kokende na Konetolama, na mokapo ya 4 ya Emoniseli. Basilaki konétolama.

221 Sikawa, milimo oyo ezali banani, kasi? Yango nde likambo oyo elandi. Ezali banani, kasi, soki bazali Lingomba ya ebandeli te? Oyo ezali Yisraele oyo asengeli kobikisama lokola ekólo, baoyo nyonso babongisámá liboso. Ezali Yisraele. Ezali Yisraele, yango moko.

222 Okoloba: “Oh, zela naino.” Olobi ete: “Ekoki kosalema te.” Oh, iyo, basengeli kobikisama.

223 Tala, tósilisa likambo yango, nokinoki. Nazali na Makomi minei to mitano. Nakozua moko mpamba. Tózua Baroma, nokinoki, mpo tóyeba soki ezali bango. Tózua Buku ya Baroma, mpe tókende na mo—mokapo ya 11 ya Baroma, bongo tokoyeba. Kaka. . . Tótánga yango kaka, na bongo tokomona yango biso moko. Baroma, mokapo ya 11, milongo ya 25 mpe 26. Sikawa bóyoka Polo awa.

224 Mpe Polo alobaki: “Soki moto mosusu, ata Mwanje, ateyi nsango mosusu,” (nini?) “asengelaki kolakelama mabe.” Bótala malamumu.

*Bandeko, nalingi te ete bójanga kosósola likambo libombami awa (ah!), bongo bomikumisa na mayele na bino mpenja te (yango mpenza); nde lolandá ekweli ndambo na Yisalele, kino kokokisa motuya mobimba na Bapakano bakoingela.*

225 Kino ntango moto ya nsuka na Mwasi na libala ya Mabota ákóta, lolandá ekomeli Yisraele na ntina wana.

*Mpe bongo Yisalele mobimba bakobika: pelamoko ekomami ete, Mosikoli moko akobima na Siona, akolongola mabe na Yakobo:*

226 Malamumu! Sikawa, bazali nde Yisraele, baoyo bazali na nsé ya etumbelo yango. Bótala malamumu. Yisraele abomamáki miso na ntina mpenza ete biso tóbikisama. Bondimi yango? Sikawa, nani abomaki bango miso? Nzambe. Nzambe abomaki miso ya bana na Ye Moko.

227 Kokamwa te, wana Yesu azalaki wana, na ekulusu, mpe Bayuda wana bazalaki kosenga mpenza Makila na Ye! Bazalaki bana na Ye Moko. Mpe Ye azalaki Makomi. Azalaki, Ye moko, Liloba. Mpe, Ayebaki ete bato yango bakoyamba Ye na esengo! Yango wana Abomáki bango miso: mpo báyeba Ye te. Ayaki na lolenge ya komikitisa mpenza, mpe Abomáki bango miso mpo báyamba yango te. Bomoni? Makomi elobaki ete bakosala bongo. Mpe Abomáki bango miso. Babomamáki miso! Yesu ayokelaki bango mawa mingi, na lolenge ete Alobaki: “Tata, limbisa bango. Bayebi te oyo bazosala.” Bomoni? Bakufaki miso. Polo alobaki ete babomamáki miso na ntina, mpo na biso.

228 Bótala. Sikawa nalingi ete bótala likambo oyo na bokebi mpenza. “Bapesamelaki bilamba.” Bazalaki na yango te. Bapesamelaki bilamba, bilamba ya mpembe, moko na moko na bango. Sikawa, basantu bazali na yango sikawa, basili kozala na yango; bazuaka yango awa. Kasi, kuna: “Bapesamelaki bilamba.” Kasi basantu basilaki kozala na oyo ya bango, mpe basilaki kokende. Bomoni? Bomoni? Bango bazalaki na— bazalaki te na . . .

229 Bango, bomoni, batikalaki kozua libaku yango te, mpo Nzambe, Tata na bango moko, abomáki bango miso; mpo ngolu ya Nzambe ékoka kokokisama, mpo Mwasi na libala azwama longwa na Mabota. Ezali bongo?

230 Bótika—bótika nátalisa bino elilingi moko ya kitoko awa na Joseph; Joseph, moto ya Molimo, mpongo. Abotamaki katikati na bandeko na ye, kaka lokola Lingomba ya solosolo katikati na lingomba mosusu. Mpe akokaki kolimbola bandoto mpe komona bimononeli. Mpe bandeko na ye bayinaki ye. Tata na ye alingaki ye.

231 Bótala, na bongo, babenganaki ye, babenganaki ye na bandeko na ye, na tata na ye te. Babenganaki ye, na bandeko na ye, mpe batekaki ye na misolo pene na ntuku misato ya palata. Babwakaki ye na libulu, mpe bakanisaki ete akufi.

232 Atómbwamaki, mpe afandaki na loboko ya mobali ya Fálo. Lokola bandeko na ye babenganáká ye, bomoni, apesamelaki mwasi ya Mabota, ya mboka na ye moko te. Na nzela yango, abótaki Efraime ná Manase, oyo babakisamaki na Yisraele.

233 Lokola Yisraele apámbolaki bango, ntango akutanisaki maboko, longwa na léki kino na kulutu, akutanisaki mapamboli longwa na Bayuda, ezongaki. . .to longwa na Bayuda kino na Mabota. Bomoni? Akutanisaki maboko, epai ya mwana ya léki, elingi koloba Lingomba ya léki, oyo eyei na nsima. “Li—lingomba mama atelemaki na kati ya mói; abótaki mwana oyo.” Mpe bótala, mpo na kozua ye, Yisraele akutanisaki maboko, na elilingi. Mpe Joseph. . .

Bana moko wana, bazalaki na mama ya Mabota.

234 Mwasi na libala, Yisraele, kuna, maboko ekutanaki, lipamboli elongwaki na ba-Orthodoxe ya kala, eyaki na nzela ya Boklisto, na nzela ya Molimo Mosanto oyo akutanisaki maboko ya Yisraele. Alobaki: “Nzambe akutanisi maboko na ngai.” Likambo yango etalaki ye te.

235 Bótala. Na bongo, Joseph, lokola bandeko na ye moko baboyaki ye, bato na ye mpenza, abalaki mwasi ya Mabota. Mpenza likambo oyo Yesu asalaki; aboyamaki na Bayuda, azuaki Mwasi na libala ya Mabota.

236 Sikawa tótanga likambo moko awa. Nakomaki Likomi moko, Misala 15. Mpe, oh, oyo ezali mpenza, tóloba, oyo

tosengeli koteya lokola malakisi, ata bongo. Sikawa, nabanzi ete oyo nakomaki yango malamú, kotánga Misala 15:14. Malamú. Nalikii ezali oyo esengeli sikawa. Malamú. “Simeona alobaki ndenge Nzambe . . .” Te, tóbanda na molongo ya 13.

*Esilaki bango koloba, Yakobo ajongisaki monoko ete, . . .*

237 Sikawa, bomoni, likambo esalemaki ezali ete, basilaki kokende epai na bato ya Mabota. Bomoni? Mpe mindondo ekótaki, mpo bango bazalaki Bayuda. Bomoni?

*Esilaki bango koloba, Yakobo ajongisaki monoko ete, Bandeko, boyoka ngai:*

*Simeona (elingi koloba Simona Petelo) asili kolimbola motindo Njambe ayei kotala Bapakano, liboso akamata bato mpo na nkombo na ye kati na bango.*

238 Ha! Bomoni, nkombo ya mwasi na ngai ezalaki Broy. Ntango nabalaki ye, akómaki Branham. Bomoni?

239 Yesu azui Lingomba na Ye, to Mwasi na libala na Ye, uta na Mabota. Elóngobani na Makomi, na bililingi, ndenge Joseph azalaki.

240 Sikawa bótala likambo oyo, sikawa, milimo oyo na nsé ya etumbelo. Ee, ba . . . oyo: “Milimo oyo,” tososoli sikawa, “oyo ezali na nsé ya etumbelo,” mpo na nini babomamáki na bato ya masumu lokola Eichmann. Bomoni? Bazali kokóba kozela, bazali ba-milió, bomoni, kasi bazali kaka Bayuda.

241 Sikawa, bómikanisela. Ezalaki nini? “Babomamáki mpo na Liloba na Nzambe,” mpo na litatoli ya Klisto te. Bosósolaki yango?

242 Kasi, bómikanisela, Lingomba mpe elekelaki wana, ba-martyr ya Lingomba, ezalaki mpo na Liloba na Nzambe mpe litatoli ya Yesu Klisto. Bato boni bayebi yango, awa na . . .? [Losambo balobi: “Amen.”—Mok.] Iyo. Malamú.

243 Sikawa, kasi baoyo bazalaki na litatoli ya Yesu Klisto te.

*. . . mpo na Liloba na Nzambe mpe mpo na litatoli litatolaki bango:*

244 Bayuda! Mpe Hitler azalaki koyina bango, lokola Eichmann, lokola Staline, ná mokili mobimba. Bomoni? Kasi bakangámaki na oyo bazalaki kondima. Mpe babomamáki bango mpo bazalaki Bayuda.

245 Boyebaki ete Martin Luther mpe azalaki mwa moke na likanisi moko wana? Ezali solo. Alobaki: “Tosengelaki kobengana Bayuda nyonso. Bazali batemeli-na-Klisto.” Bomoni? Kasi azalaki na ntango ya eleko mosusu, mpe azalaki komona te, azalaki komona Liloba te.

246 Sikawa Liloba, Solo, eyei. Ndenge nini bokoki koboma miso ya Yisraele? Bokokoka te. Te.

247 Oh, ndenge nini mosakoli wana akokaki kotelema wana, mokolo wana, mpe koloba: “Ozali lokola mpakasa, Yisraele”? Na ntango oyo bazalaki koluka kolakisa ye ngámbo ya mabe koleka ya likambo! Alobaki: “Ee,” alobaki, “oyo nyonso akopambola yo akopambolama, mpe oyo nyonso akolakela yo mabe akolakelama mabe.” Ya solo. Oh, la la! Bokosala yango ndenge nini?

248 Mokolo moko bakanisaki ete Nzambe akobósana, ntango mosakoli amonaki likambo ya mawa oyo ekokómela Bayuda. Moto yango atelemaki wana, mpe Liloba na Nzambe ezingaki ye. Alobaki: “E Nkolo, Okotika nde libota na Yo?”

Alobaki: “Eloko nini ezali wana, mpembeni na yo?”

Alobaki: “Lingenda mpo na kopíma.”

249 Alobaki: “Líkoló ezali na bolai boni? Píma yango.” Ah-ha. “Mbu ezali na bozindo boni?”

Alobaki: “Nakoki kopíma yango te.”

250 Alobaki: “Ngai mpe nakoki te, Ngai mpe nakoki kobosana Yisraele ata moke te.” Te, misie. Akobosana ye te.

251 Asengelaki koboma miso ya mwana na Ye moko. Sikawa, bókánisa naino. Koboma miso ya mwana na Ye moko, mpo na kopesa biso libaku, kasi toboyi Yango. Sikawa, yango esalaka ete ómimona moke mingi na lolenge ete okoki konguluma na nsé ya beton kozanga ete ómama yango, wana olati ekoti ya ba-cow-boy, boye te? Ezali mpenza moke mingi, boyebi. Oh, la la! Iyo.

252 “Bakangamaki na Liloba na Nzambe.” Bazalaki Bayuda. Bazalaki na mibeko na bango; batikalaki ná yango. Bozali komikanisela lobi na mpokwa? Bomoni? Batikalaki ná yango. Mpe bazalaki Bayuda, mpe bazalaki na mobeko. Mpe mobeko ezalaki Liloba na Nzambe, mpe batikalaki mpenza ná yango. Ya solo. “Mpe mpo na litatoli oyo bapesaki, babomamáki.” Mpe milimo oyo ezalaki na nsé ya etumbelo yango oyo, nsima na Lingomba kokende.

253 Sikawa bótala malamumu. Kati na lolandá na bango, babomáki Masiya na bango, mpe sikawa bakómaki kobúka mbuma mpo na yango. Basósolaki yango. Bayebaki yango, nsima na yango kosalema. Bamónaki Ye, na ntango wana, ntango bayaki liboso na etumbelo ya Nzambe. Kasi sikawa ngolu na Nzambe epesameli bango.

254 Bótala malamumu. Sikawa, bakokaki ata moke te kozala basantu, mpo basilaki kolatisama bilamba. Kasi tala bazali awa sikawa, kaka “milimo na nsé ya etumbelo, mpo na Liloba na Nzambe, mpe litatoli oyo bapesaki,” ete bazali libota ya Nzambe, Bayuda.

255 Kasi sikawa, bótala malamumu, ngolu ya Nzambe epesameli bango. Mpe Yesu apesi bango, moko na moko, elamba ya mpembe, (oh, la la, bótala malamumu; nsima mpenza, wana Lingomba esili kokende), mpo bazalaki sembo na likambo

na bango. Mpe babomamáki miso, kasi bayebaki yango te. Bayebaki yango te. Bazalaki kosala mpenza mosala oyo Nzambe abongisáká mpo na bango. Mpe tala, awa, Yoane abwaki miso mpe amoni milimo na nsé ya etumbelo. Sikawa bótala malamumu, amoni milimo yango. Bótala malamumu ndenge abengi bango.

Bagáangi: “Nkolo, kino ntango nini?”

Bótala malamumu: “Kaka mwa ntango moke lisusu.” Bomoni?

<sup>256</sup> Tólobela yango, wana tozali kokoba, na kati ya Makomi sikawa. Basósoli ete basilaká koboma Masiya na bango. Bomoni? Kasi bayebaki yango te, kasi na ntango wana, basósolaki. Bango mpe ba—babomamaki, mpo na kofuta mpo na yango: mpo na misala na bango ya mabe. Sikawa botala likambo oyo batíndamaki kosala! Bomoni, lokola bango babomáki, bango mpe babomamáki. Bomoni? Bagángaki: “Makila na Ye ézala likoló na biso!” Bomoni? Ya solo. Mpe babomamáki miso.

<sup>257</sup> Sikawa, soki bábomamaka miso te; Nzambe alingaki koloba: “Bótika bango. Balóngobani te.” Kasi lokola Nzambe abomaki bango miso, ngolu na Ye ekitaki likoló na bango. Amen! Ezali mpenza ngolu ya kokamwa! Mpe apesaki elamba na moko na moko na bango, mpo Yisraele bakobika, moto nyonso oyo nkombo na ye ekomámá. Ya solo. Yesu apesaki bango bilamba.

<sup>258</sup> Ndenge Joseph asalaki mpo na bandeko na ye; elilingi. Bótala, ntango Joseph atelemaki wana, mpe sukasuka, ntango. . . Amitalisaki wana, mpembeni na etumbelo, etumbelo na ye moko, na ndako na ye ya bokonzi, na ngwende na ye. Alobaki: “Bato nyonso bábima.” Mwasi na ye azalaki kuna na ndako ya bokonzi; epai Mwasi na libala akozala.

<sup>259</sup> Mpe alobaki na bango, alobaki: “Boyebi ngai te?” Hé, akómi koloba ki-Ebele sikawa. “Ngai nde ndeko na bino, Joseph.” Oh, la la!

Balobaki: “Sikawa, oh, okosilana ná biso.”

<sup>260</sup> Alobaki: “Bózela naino. Bózela naino. Nzambe asalaki yango na ntina. Asalaki ete bóbengana ngai, mpo nábikisa bomoi ya bato.” Nkembo! Yango mpenza, ezali bongo. Alobaki: “Te, bósilika te.” Bozali komikanisela ete Joseph alobaki bongo? Alobaki: “Bósilika te. Nyonso ezali malamumu sikawa. Nyonso wana esili. Nzambe atindaki ngai awa, liboso na bino.”

<sup>261</sup> Boyebi, Biblia elobaki ete bakoloba na Ye, ntango bakomona Ye koya, balobaki: “Tala, Yo nde Masiya, toyebi yango. Kasi, kasi, bilembo ya mpota oyo euti wapi?” Bomoni?

<sup>262</sup> Alobaki: “Oh, Nazuaki yango na ndako ya baninga na Ngai.” Banninga?

<sup>263</sup> Na bongo, ntango basósolaki yango, baoyo batikalaki, nkóto mokama na ntuku minei ya minei, Biblia elobi ete bakokabwana, libota moko na moko na esika na yango. Mpe bakozua mikolo mingi, kaka mpo na kolela, mpe kokimela, komata kokita;

koloba: “Tosalaki yango ndenge nini? Tosalaki yango ndenge nini? Ee, tobákaki Masiya na biso moko na ekulusu.” Elobami ete bakolela lokola libota oyo ekufeli mwana na likinda: “Tosalaki yango ndenge nini?”

<sup>264</sup> Bayuda bazali—bazali basambeli ya minene koleka na mokili; baponami ya Nzambe. Kasi Abomáki bango miso, mpo na kozua biso, kasi biso tozali koboya Yango. Kosambisama ya lingomba ya Mabota ekozala ndenge nini! Yango wana mpenza. Bomoni? Nzambe abomaki bango miso na ntina, mpo Ákoka kozua biso, Mwasi na libala mpo na Yesu. Kobimisa bango libanda na . . . Bomoni? Mpe Asilaki kotalisa yango liboso, mpe nyonso wana.

<sup>265</sup> Sikawa bomoni banani milimo yango ezali? Bazali basantu oyo babomamáki te. Bango basilaki kokende. Ezali ya solo. Bótala, basilaki, basilaki kokende. Bomoni?

<sup>266</sup> Boye, baoyo bapesameli bilamba, moko na moko na bango. Sikawa nalingi ete bomona yango. Kasi sikawa, ngolu ya Nzambe ekiti likoló na bango. Yesu apesi na moko na moko na bango elamba ya mpembe, ndenge Joseph asalaki, ngolu na ye mpo na bandeko na ye.

<sup>267</sup> Sikawa bótala malamumu. Ata bango mpe balukaki kokabwana na Joseph, kasi ngolu na ye ekitaki kino epai na bango. Bomoni? “Oh, likambo ezali te. Likambo ezali na yango te. Bosalaki yango na nkó te. Kasi, bomoni, Nzambe nde asalaki yango. Bomoni? Nzambe atikaki ete bósala yango mpo Ákoka kobimisa ngai kuna, mpe Ámema ngai kino awa, mpo nákoka kobikisa bomoi ya bato, bato ya Mabota oyo, awa, epai nazui mwasi na ngai. Nalingaki kozua mwasi te soki—soki nátikalaka kuna. Sikawa, nalingaka mwasi na ngai. Abóteli ngai bana oyo, awa.” Mpe alobaki: “Na—na . . . Sikawa—sikawa, nakozua bino nyonso. Sikawa bino nyonso bokokóma mpe malamumu. Nakomema bino awa. Bisu nyonso tokofanda elongo, lokola libota moko monene.” Bomoni? Bomoni? Bomoni? Alobaki: “Nalingi kotuna bino likambo moko. Mobange ya tata na ngai azali naino na bomoi?” Oh!

<sup>268</sup> Bótala ye malamumu, eloko nini asalaki mpo na elenge Benjamin, oyo azali etaliseli ya nkóto mokama na ntuku minei na minei, ndenge tokomona yango na nsima. Bomoni eloko nini asalaki? Akendeiki mbangu epai ya Benjamin, akweiyaki na nkingo na ye mpe abandaki koyambayamba ye. Léki na ye ya mobali oyo abótamaki na libota ntango ye asilaki kokende, bomoni; ná mama na ye, lingomba ya liboso, lingomba Orthodoxe. Bato nkóto mokama na ntuku minei na minei babótamaki ntango ye azalaki te, wana Ye asilaki kokende kozua Mwasi na libala na Ye ya Mabota. Oh, la la! Yango ezali kosala bino eloko moko boye te? Yango mpenza. Boye, bomoni oyo bango bazali? Bango wana.

269 Bótala sikawa, atako balukaki kolongola Joseph, ngolu na ye ekómaki kino epai na bango.

270 Atako bango balukaki kolongola Yesu, Ye ayei kaka epai na bango, mpo babomamáki miso, mpe apesi bango, na moko na moko, elamba ya mpembe. Akomema bango sémba na ndako, ata bongo. Ekosala bokeseni ata moke te, mpo Asílá koloba: “Nakobikisa bango nyonso, ata bongo.” Bomoni?

Sikawa, molongo ya 10. Bótala, baséngaki mpo na “kozóngisa na mabe na mabe.” Bomoni?

271 Sikawa, soki ezalaki Mwasi na libala, balingaki kosala ndenge Stefano asálaki: “Tata, limbisa bango,” boyebi. Bomoni?

272 Kasi baoyo bazali Bayuda oyo bauti kokota, bomoni. Bazalaki kosenga kozongisa mabe na mabe. Bótala lisusu, bomoni, lisusu, Alobaki. . . Bótala, ezali te. . . Alobaki: “Ezali bandeko na yo,” Bayuda. Bato nkóto mokama na. . . Sikawa, bango bazalaki na mposa ya kozongisa mabe na mabe. Balobaki: “Oh, toko. . . Biso, tolingi ete Ózongisa mabe mpo na biso kuna.”

273 Alobaki: “Etikali moke, sikawa, Etikali moke.” Mpamba te, bótika nátanga yango. Ezali na—na molongo ya 10. Malamu.

*Bangáangi na mongongo makasi ete, Kino ntango nini, E Nkolo mosanto mpe na solo, okosambisa te mpo na kobukanisa bango bafandi na mokili na ntina na makila na biso?*

*Elamba mpembe epesami na bango moko moko; mpe elobami na bango ete, naino mwa ntango moke, bomoni, (nini?) mwa ntango moke bakopema. . . kino ekokoka motuya na baninga na bango baombo. . .*

274 Bomoni? Sikawa ezali nini? Basakoli sikawa bazali koteya na Yisraele. Bomoni?

*. . . kino baninga na bino baombo. . . baninga na bino baombo, ná bandeko na bino baoyo bakobomama. . .*

275 Bomoni, baoyo babongisámá liboso mpo na koleka na yango. Bomoni?

*. . . baoyo bakobomama lokola esili bango mpennja kobomama.*

276 Bomoni, na elobeli mosusu, babongisámá liboso mpo na yango. Ezali Makomi, ete basengeli koleka na yango. “Bópéma naino mwa moke. Sikawa bozui bilamba na bino; bozokende na ndako; kasi bófanda kuna mwa moke, bomoni, bózela mwa moke.”

277 Sikawa bótala. Sikawa bótala: “Bandeko na bino.” “Bandeko na bino basengelaki naino kobomama,” elingi koloba bato nkóto mokama na ntuku minei na minei oyo basengeli kobéngama na ntango ya Monyoko. Bato nkóto mokama na ntuku minei na minei oyo bakobéngama.

278 Elingaki kozala malamau soki tozalaki na ntango. Tokoki kolobela yango lobi na mpokwa, soki Nkolo alingi, biso . . . liboso tóbanda Elembo mosusu. Bomoni?

279 Lisusu, sikawa bótala malamau, basengeli kobomama na motemeli-na-Klisto. Touti koyekola yango; mpe bótala, na kobima na ye ya nsuka, ntango akobuka—akobuka boyokani na ye ná Bayuda. Mpe ye wana akei. Bomoni?

280 Bayuda oyo, mokama na ntuku minei na minei, basengeli kobéngama na batatoli mibale ya Emoniseli 11. Sikawa, bómikanisela, basengelaki kosakola.

281 Bosili kotánga yango. Bato boni basilá kotánga yango? [Losambo balobi: “Amen.”—Mok.] Na ntembe te, biso nyonso toyebi Likomi yango, mpo totángaka yango.

282 Mpe bakosakola, batatoli mibale oyo bakosakola, na ntango ya ndambo ya mibale ya mpóso ya ntuku nsambo ya Daniele. Elingi koloba mibu misato na ndambo ya nsuka.

283 Boyebi lisusu ntango toyekolaki mpóso ntuku nsambo ya Daniele? Nalobaki ete tokosengela na yango ntango tokokóma awa. Nayebaki te mpo na nini, kasi na . . . Eloko moko eyebisaki ngai ete tokosengela na yango, mpe tala biso oyo. Iyo. Bomoni?

284 Bótala, na ntango ya Daniele. Sikawa bómikanisela, bayebisaki Daniele ete: “Masiya akoya,” mokonzi, “Masiya,” kútu nde, “mpe Akosakola. Yisraele etikalaki na mpóso ya ntuku nsambo. Mpe na katikati ya mpóso ya ntuku nsambo, Masiya akolongolama, mpe mbeka ya mokolo na mokolo ekolongolama.” Ezali solo? “Kasi etikalaki mibu misato na ndambo, na bampóso oyo ekatamaki.”

285 Na ntango yango, Azui Mwasi na libala ya Mabota, sikawa, Anétolami, nsima na Ye konétolama, basakoli mibale bakotélema na Yisraele. Bomoni?

286 Mpe milimo ya baoyo basili kobomama, sikawa, kino awa, Bayuda ya solosolo mpenza, na ntango yango, baoyo bankombo na bango ekomamaki na Buku, baoyo bazalaki kobika bomoi ya malamau mpe kosala makambo ya malamau, baoyo bazalaki kobika bomoi ya Bayuda mpenza. Babomamáki na Eichmann ná bamosusu mingi. Bato ya sembo, bamilió kati na bango kuna! Ba-Allemand babomaki bango na masasi, bakufisaki bango, bapesaki bango liwa, mpe batiaki bango ba-nsinga na nkingo, likoló na bitutú ya mapángo, batumbaki bango, mpe bakomisaki bango putulú, mpe mosusu nyonso wana. Bato bazángá mitema, to mitema etondá mposa ya makila, Hitler, Staline, Mussolini ná bato nyonso oyo bazalaki koyina Bayuda!

287 Nakanisi ete wana ezali moko na—moko na makambo oyo ezali kosala ete ekólo oyo ézala naino: mpo bamémiaka ntango nyonso Moyuda, ya solo, bapésá ye esika. Pesa Moyuda limemia, Nzambe mpe akomémiya yo.

288 Sikawa, ezali na Bayuda oyo bazali batomboki, lokola mpe ezali na bato ya Mabota oyo bazali ndenge moko.

289 Kasi Moyuda ya solosolo, Nzambe akomá nkombo na ye na Buku liboso ya kozalisama ya mokili. kasi awa, abomamáki na ntango oyo. Mpe bómikanisela, bokanisa naino sikawa, ndenge ebongi be mpenza. Mpenza nsima na ba-milió ya Bayuda kobomama na bikólo ya mokili mobimba, ata basalaki na bango mabe moko te; awa Likomi elobi ete na ntango oyo moko na moko na bango azali na nsé ya etumbelo, nde basósoli eloko oyo esalemaki, mpe bapesamelaki bilamba ya mpembe.

290 Mpe balobaki: “Ee, mpo na nini? Tokoki kozonga na bokonzi sika-sikawa?” Bokonzi ya Bayuda esengeli kotiamama na mokili, boyebi. Yoane alobaki ete bokonzi ezalaki kuna, bomoni, esengeli kotiamama.

Sikawa, oyo ezali Bokonzi ya Nsango-malamu, bomoni.

291 Kasi bokonzi ya Bayuda ekoteyama na—na basakoli mibale yango, boye, bótala, bo—bo—bokonzi ya mabelé awa.

292 “Bokonzi ya Likoló ezali koteyama,” . . . na Bayuda, to epai ya . . . nalingi koloba, “epai ya Mabota.”

293 Bokonzi ya awa na mokili, esengeli kotiamama na Millennium, nsima na Millennium, mpo na Bayuda.

294 Sikawa bótala. Bótala likambo oyo sikawa, awa, wana ba—wana bazali koteya, bomoni.

295 Liboso ba—basakoli yango bábanda mpenza mosala; Bayuda oyo basengelaki kokufa na ntango ya Eichmann ná bamosusu, ezali moko na moko na baoyo babongisamáka liboso, bapesami (na ngolu) elamba ya mpembe. Moko na moko na bango apesamaki elamba ya mpembe. Bótala.

Sikawa, likambo nini esalemaki? Kaka ntango likambo yango esalemaki . . .

296 Nazolandela sáa wana na nsima kuna, mpe nayebi ete ntango ebandi—ebandi koleka. Kasi nalingi te . . . Bomoni, na—na . . . Bango . . . namoni bato oyo batelemi kuna. Nzambe ázunga bino, bandeko. Nazolikya ete moko na moko na bino ápesamelama elamba ya mpembe mokolo yango, bomoni. Botelemi, bozali kopésana bisika, wana makolo ezali kosala mpati. Mpe bamosusu basalaki mosala moi mobimba. Nayebi ndenge ezalaka. Mpe bótala . . . Mpe na baike ya mwa mibange basi oyo batelemi. Namoni mibali mosusu kopesa bisika na bango na basi; mpe moto mosusu apesi esika na mama moko oyo azali na bebé. Mpe na—na—na—nazali komona nyonso wana, bomoni, mpe nandimisami ete Ye mpe azali komona. Bótala. Kasi nalingi koumisa bino te. Soki nakoki bobele komema bino na komona Nsango yango, yango nde nyonso oyo nalingi ete bósala, bomoni.

297 Sikawa bótala Bayuda yango. Nasengeli kosala boye, mpo na kotika bino bómona emoniseli ya Elembo oyo; komona oyo yango ezali, milimo oyo ezali na nsé ya etumbelo, mpe nani bango bazali. Sikawa bótala.

298 Na ntango ya Daniele, sikawa, ndambo ya mibale ya mpóso ya ntuku nsambo. Sikawa bómikanisela: “Masiya asengelaki kolongolama na katikati.” Na katikati mpenza. Ee, ndambo ya nsambo ezali nini? [Losambo balobi: “Misato na ndambo.”—Mok.] Misato na ndambo. Klisto ateyaki mibu boni? [“Misato na ndambo.”] Ya solo. Sikawa: “Kasi yango nde etikali, mpo na libota yango,” (nini?) “etikali mibu misato na ndambo.”

299 Ee, na ntango yango, ee, bomoni, likambo oyo ekosalema ezali ete, Mwasi na libala ya Mabota aponami kati na bileko nsambo ya lingomba, mpe Anétolami.

300 Nsima na yango, Bayuda nyonso oyo babomámá na ntango yango, mpo babomamáki miso, baoyo bazali na nsé ya etumbelo, Nzambe apusani mpembeni na bango mpe Alobi: “Bomoni oyo yango ezalaki? Sikawa Napesi elamba na moko na moko na bino.”

Bango balobaki: “Kino ntango nini, Nkolo? Tokozonga nde sikawa?”

301 Alobaki: “Te, te, te, te. Banninga na bino bato, Bayuda, basengeli naino konyokwama mwa moke. Basengeli kobomama ndenge bino bobomamáki. Nyama yango asengeli koboma bango, ntango akobuka boyokani na ye.”

302 Sikawa bótala. Sikawa bótala, ntango kaka...Sikawa bómikanisela, basakoli yango basengeli kosakola, kokokana na Emoniseli 11. Bótombolaki maboko mpo na koloba ete bosilá kotánga yango. Bomoni? Mpe basili kopesama nguya.

303 Mpe tokomona soki bango bazali banani, kala mingi te, soki Nkolo alingi. Sikawa bótala oyo basakoli yango bazali. Sikawa, Biblia elobi yango awa. Ya solo mpenza, Alobi yango. Ya solo mpenza! Bomoni?

304 Sikawa, bótala, na katikati na yango, mpóso misato ná ndambo sikawa, wana bazosakola awa na nsé, e—Emoniseli awa elobaki. . . Mpe ba—basakolaki mikolo nkóto na nkama misato na ntuku minei. Soki. . .

305 Sikawa, manáka ya Bayuda mpenza, ntango mpenza ya manáka ya Nzambe, ezalaka mpenza na mikolo ntuku misato na sanza moko. Manáka ya Baroma nde ekotísá yango mobulu. Manáka na momesano ezalaka na mikolo ntuku misato na sánzá moko.

306 Sikawa, soki bozui mikolo ntuku misato, mpe boyíkanisi yango na mibu misato na ndambo, bomoni, mikolo ntuku misato, mpe, ee, epesi mikolo boni? Mikolo nkóto na nkama misato na . . . to na nkama mibale na ntuku motoba. “Mikolo nkóto na

nkama mibale na ntuku motoba (na mikolo ntuku motoba),” mibu misato na ndambo mpenza.

307 Sikawa, bomoni, yango ezali na libunga te. Yango mpenza, elongobani mpenza malamumu, lokola biteni mibale oyo—oyo ebalani malamumu moko ná mosusu. Bótala, basakoli mibale yango bateyaki na Bayuda mibu misato na ndambo. Na ntango yango nde bato nkóto mokama na ntuku minei na minei babéngamaki.

308 Na bongo, bótala, basakoli mibale yango bazali mpenza Mose ná Eliya. Bomoni? Bomoni? Sikawa bótala, bótala, ya bango. . . Bótala lotomo na bango. Sikawa bótala malamumu eloko oyo basakoli yango bakosala. “Bazali na nguya ya kobeta mokili na bolozzi, mbala nyonso bakolinga.” Nani asalaki yango? Mose. “Bazali na nguya ya kokanga likoló, mpo mvula ébeta te na mikolo ya lotomo na bango.” Nani akangaki likoló mibu misato na ndambo? [Losambo balobi: “Eliya.”—Mok.] Bango wana. Ezali bango. Bomoni, ezali. . .

309 Bomoni, moto, soki akufi, abóngolaka ezalela na ye te. Abongolaka lolenge na ye te, bomoni. Bótala, ntango—ntango, liboso. . .

310 Ntango Saulo azóngaki nsima, mpe mosakoli moko te azalaki na kati ya mboka, ye ayebaki te likambo ya kosala—kosala te. Akómaki na kókóso mingi mpenza. Asengelaki kokende na etumba. Akendeki epai ya mwasi nganga-nkisi na Ene-Dore.

311 Sikawa, bazalaki bobele na makila ya ba-ngombe ná bantaba, mpe akokaki kosala yango. Mpe abengaki molimo ya Samwele.

312 Ntango Samwele amatáki, atelemaki wana, alati elamba na ye ya mosakoli. Kaka yango te, kasi azalaki mosakoli kino na ntango yango. Alobaki: “Mpo na nini obengi ngai mpo ná bima libanda na kopema na ngai,” bomoni, alobaki, “mpo okómi monguna ya Nzambe?” Alobaki: “Na ngonga oyo, lobi na mpokwa, okokwea na etumba. Mpe na ngonga oyo, lobi na mpokwa, okozala elongo na ngai.” Mpe yango mpenza nde eloko oyo esalemaki. Bomoni? Ezali kaka te. . . Azalaki kaka naino mosakoli. Bomoni?

313 Mpe bato yango bazali naino basakoli. Sikawa, tokokota na mwa bozindo na yango, kala mingi te, soki Nkolo alingi. Bomoni?

314 Oh, la la, nalingaka mpenza Liloba yango! Kokamwa te ete: “Moto akobika bobele na lipa te. Liloba mobimba oyo ebimaka na monoko ya Nzambe!”

315 Basakoli mibale yango, ezali Mose ná Eliya, kokokana na misala na bango, basalaki lisusu misala na bango. Wana, wana ezalaka ntango nyonso lotomo na bango. Sikawa bótala, kaka ndenge basaláká. Yango ebóngolaki bango te. Bómikanisela, mibali oyo batikálá kokufa te. Bótala malamumu. . .

316 Sikawa, bóbúlunganisa bango te, liboso tótika likambo oyo. Bóbúlunganisa lotomo ya Eliya te, ya mbala ya mitano, ná lotomo na ye ya mbala ya minei. Nazali kokoba koyebisa bino, Lingomba ya Mabota ezali kozela Eliya. Ya solo.

317 Mpe ye oyo awa, elongo ná Bayuda. Bómikanisela, akoki koya mbala minei te; wana ezali—wana ezali motángo ya monguna. Asengeli koya mbala mitano.

318 Mbala ya liboso ayaki, azalaki Eliya, ye moko. Mbala elandi ayaki, azalaki Elisa. Mala ya nsima elandi ayaki, azalaki (nani?) Yoane Mobatisi. Mbala ya nsima oyo akoya, ezali mpo na mwanje ya nsambo. Mpe mbala ya mitano oyo akoya, akozala elongo ná Mose kuna, akoteya bango. Ya solo. Iyo, misie. Bóbúlunganisa yango te. Ah-ha.

319 Mitano, soki boyebi mitángo na bino ya—ya Biblia, mitano ezali motángo ya ngolu na mosala. Mpe yango nde eloko oyo Asali. Sikawa, bótala malamú, soki bolingi koyeba epai ezali. Yesu azalaki nde mosala ya ngolu? Y-e-s-u, [na anglais: J-e-s-u-s—Mok.] nkomá mitano, m-o-s-a-l-a [na anglais: l-a-b-o-r]. Boye te? Mosala, mpo—mpo na bolingo na bino. Mpe, soki oyei epai na Ye, bayáka ndenge nini, na nini? K-o-n-d-i-m-a [na anglais: f-a-i-t-h] kati na m-o-s-a-l-a. Boye te? Mosala ezali motángo ya ngolu, malamú, mpo na bandimi.

320 Bótala, Eliya ya liboso, ezalaki ye moko. Ya mibale ezalaki Elisa. Ya misato ezalaki Yoane. Ya minei ezalaki mwanje ya nsambo, to motindami ya nsuka na Lingomba, kokokana na Malaki 4 mpe Emoniseli 10:7. Sikawa, mbala ya mitano, azali motindami epai ya bayuda, epai ya bato nkóto mokama na ntuku minei na minei, epai ya Bayuda, nsima na Lingomba kokende.

321 Na—na—namiyoki mwa ndenge mosusu, bomoni. Bomoni? Bótala, soki bamosusu bakanisaka . . . Nalingi ete bósosola yango sikawa, bomoni. Soki bamosusu bakanisaka ete Malaki 4, “kozongisa” bato, ezali likambo yango moko oyo akosala epai ya Bayuda, soki bakanisaka ete nyonso ezali kaka ndenge moko, bótika ete násembolela bino yango, kaka miníti moko. Bomoni, ekoki kozala mwa moke mobulu. Mpamba te, bóbosana te, na Malaki 4, elobami: “Kozongisa Kondima ya batata . . . to ya bana epai ya tata.” Bomoni, kozongisa epai ya tata!

322 Sikawa bótika nálakisa bino bokeseni ya lotómo. Soki ayei mpo na kozongisa Kondima ya bana epai ya batata, akowangana Klisto. Akozonga lisusu na mobeko. Ya solo? Batata batósaki mobeko. Bososoli yango?

323 Bótala, ntango Elisa, ntango ayaki kokokisa lotomo na ye na Malaki 4, bomoni, lokola Malaki 4, Eliya azalaki ye moko.

324 Kasi ntango ayaki kokokisa lotomo epai ya Bayuda, ya Emoniseli 11, azali ná Mose elongo ná ye. Boye, mobulu ezali te, ata moke te. Bomoni? Bososoli yango?

325 Ntango Elisa akoya, oyo ya Malaki 4, akozala ye moko. Eliya akozala wana; Eliya ná Mose te. “Eliya” akoya. Kasi mpemela moko wana elobaki ete Eliya akoya na eteni ya nsuka ya eleko ya lingomba, “mpo na kozongisa Kondima ya bana na Kondima ya ebandeli, ya batata,” Kondima ya bantóma, epai bosengeli kozonga. Kasi motemeli-na-Klisto asili kobimisa bango nyonso libanda. “Mpo na kozongisa,” Makomi mosusu nyonso ezali mpenza na boyokani. Bomoni, akoya ye moko. Bomoni?

326 Kasi ntango akoya na Lingomba, Biblia . . . to ntango akoya epai ya bankóto mokama na ntuku minei na minei, Biblia elobi polele ete bango mibale. . . Bakozala mibale, moko te. Mibale! Mpe lotomo na ye ya liboso ekokaki kozua Bayuda te mpo na kozongisa bango na mobeko, akómi . . . mpo akoya koteyáká Klisto na bankóto mokama na ntuku minei na minei, amen: “Tala Ye wana, Masiya oyo alongolamaki.” Amen! Ezali bongo, boye, bóbulunganisa yango te. Ezali na mobúlungano te. Makomi ekosaka te, ata moke te.

327 Nkembo! Oh, ntango namonaki yango, nakómaki kopumbwa-pumbwa! Nalobaki: “Natondi Yo, Nkolo,” ntango nazalaki kotala yango kosalema kuna. Namonaki Eliya yango koya kuna, mpo na eleko ya liboso wana, ye moko, mpe azalaki ye moko. Nsima na yango, ntango namonaki ye koya lisusu, mosika mpenza na esika mosusu, bazalaki mibale, ntango oyo wana esalemaki. Nalobaki: “Ezali yango mpenza. Oyo wana, ekoki mpenza, Nkolo. Amen! Namoni yango sikawa! Aleluya!” Ezali mpenza bongo.

328 Soki nálobelaka yango te, elingaki kozala mwa mobulu mpo na moto moko. Kasi A—Ayebisaki ngai nálobela yango, boye nasali yango.

329 Bótala, bato oyo bapatelami na bomoi na Nzambe, longwa na lotomo na bango ya ebandeli, mpo na mosala oyo ekoya na nsima; basálaki mosala na bango malamumu mpenza. Bomoni? Bókanisa naino, molimo wana ya Eliya ekokisi lotomo na ye mbala mitano; oyo ya Mose, mbala mibale. Ezali nini? Babatelami na bomoi mpo na mosala oyo ekoya kuna na nsima.

330 Ata moko na bango te akufaki; bóndima yango te. Bamonaki bango mibale, na bomoi, kosololáká ná Yesu na Ngomba ya Mbongwana. Kasi, bóbosana te, basengeli kokufa.

331 Sikawa, sikawa, Mose akufaki mpenza. Kasi asekwaki, mpo azalaki mpenza elilingi ya Klisto. Bomoni? Moto moko te atikálá koyeba esika oyo akundámáká. Banje bayaki kozua ye. Bomoni? Banje nde bamemaki sanduku na ye. Ah-ha. Mpo na nini? Moto moko te akokaki komema ye epai azalaki kokende. Asilisáki mosala na ye, esili wana. Banje nde bamemaki sanduku na ye, bomoni, mpo Bamemaki ye epai oyo asengelaki kozala. Moto moko te ayebi yango.

332 Ata Satana, ayebaki ata yango te. Awélanaki ná Mokóló-na-Banje. Ya solo. Azalaki kosósola te likambo oyo ekómelaki Mose. “Namonaki ye kolénga-lenga kuna. Azalaki kotambwisa miso na mboka mobimba, mpe kotala-tala bana, ná nyonso wana, namonaki ye kolénga-lenga. Kasi amataki likoló na Libanga, mpe ezalaki mbala ya nsuka oyo namonaki ye.”

333 Nde Libanga yango! Nde Libanga yango! Tika ete nátelema likoló na Libanga yango, na nsuka ya mobembo na ngai! Iyo, misie! Sikawa, ba...Bandeke na ngai ya moindo bazaláká koya koyémba mwa loyembo moko awa ete: “Soki nakokaki, na ntembe te nalingaki kotelema likoló na Libanga oyo Mose atelemaki likoló na yango.” Iyo, misie! Oh, likoló na Libanga yango nde ngai mpe nalingi kotelema. Na nzela ya kondima, natelema wana.

334 Kasi bóbosana te, Eliya, alembaki mpenza, mpo azalaki na mosala monene oyo ezalaki kozela ye. [Ndeko Branham apemi. Losambo baseki—Mok.] Boye, alembaki mpenza, mpe Nzambe atindelaki ye likalo mpo émema ye na Ndako, ezali solo, Atindaki likalo. Ezali solo? Amemaki ye na likoló. Atikálá kokufa te, mpo Abatelaki ye na bomoi. Abómbelaki ye mosala moko mpo na mikolo ekoya. Asalaki ete ápakola mpe moto moko, bomoni, mpo ákende ná Molimo na ye.

335 Kasi basengeli koleta liwa. Sikawa, Emoniseli, mokapo ya 11. Sikawa, tózua yango, nazali kaka wana, ata bongo. Tózua naino yango, Emoniseli 11. Bótala malamau mpo bómona soki bango mibale bakobomama te. Iyo, misie. Bango mibale basengeli koleta liwa. Iyo, misie. Nsima na lotómo na bango kosila, bakoleta liwa. Emoniseli 11, tóbanda na 7.

*Wana ekosilisa bango . . . litatoli na bango, nyama oyo akobuta na libulu na bozindo . . . akobunda ná bango etumba, . . .*

336 Oh la la, akokoka koyíkela yango mpíko te; batúntuki wana bayei lisusu, bomoni. Malamau. Malamau.

*. . . oyo akouita na libulu na bojindo . . . akobunda ná bango etumba, akoleka bango, mpe akoboma bango.*

337 Kasi bótala malamau likambo oyo ekosalema. Ezali etaliseli ya malamau be mpenza sikawa.

*Bibembe na bango bikolala na balabala—na balabala na mboka yango monene, . . . na molimo . . . ebiangami Sodomá ná Ejipito, esika oyo Nkolo na biso mpe abakisamaki na ekulusu, (Yelusaleme, bomoni).*

338 Sikawa basengeli koléta liwa, (boye te?) ya solo, ntango lotómo na bango ekosila.

339 Mpo na nini? Lotómo ya mwanje ya nsambo, lotomo ya mwanje ya nsambo, lotomo ya Eliya mpo na mwanje ya nsambo, ezali te. . . Mpo na nini te, mpo na nini ekoki kosalema te, kútu,

yango nde nazoluka koloba, ete lotomo ya mwanje ya nsambo ékokisama na nzela na Mose, soki akufaka te, ndenge ekokaki kozala na nzela na Eliya? Mpo na nini te bango. . . Mpo na nini Nzambe atindaki kaka te, alobaki: “Eliya, yo—yo osalaki mosala makasi mingi, Ngai. . . mpe nyonso wana, na bisika ndenge na ndenge. Na—nabanzi nakotinda kaka Mose kuna”? Mpo na nini?

<sup>340</sup> Bótala lotomo ya Mose. Eliya azalaki mosakoli mpo na bikólo nyonso; kasi Mose azalaki mopesi-mibeko bobele mpo na Bayuda. Amen. Mose azali wana mpo na koloba. . . Ntina oyo ayei elongo ná Eliya. . . Bayuda balobaka: “Bózela, biso tozali kokóba kotosa mobeke awa.” Kasi tala Mose ye moko atelemi wana; mpe Eliya atelemi wana elongo ná ye. Oh! Bomoni? Akoya bobele epai na Bayuda. Bomoni? Mose akendeki bobele epai na Bayuda; mosakoli Eliya azalaki mpo na bikólo nyonso. Kasi Mose akómaki mosakoli mpo na Bayuda, mpe mopesi-mibeko. Bomoni? Yango nde ezalaki nsango na ye, mobeko.

<sup>341</sup> Kasi nsango ya Eliya ezalaki nini? Mpo na basi oyo bakátaka suki; ba-denomination. Iyo, misie. Mpe apanzaki bango kopanza mpenza. Baoyo bazalaki kopakola-pakola; ayebisaki bango: “Bakopesa bino lokola bilei na bambwa.” Apanzáki bango kopanza mpenza.

<sup>342</sup> Na nsima ntango Molimo na ye ekitaki likoló na Yoane, abimaki mbala moko na lisobe mpe asálaki ndenge moko. Ya solo. Alobaki: “Bókanisaka te ete tozali bato ya *oyo* to *oyo kuna*. Nzambe azali na makoki ya kotelemisa bana mpo na Abraham longwa na mabanga oyo.”

<sup>343</sup> Apusanaki mpembeni na Erodias, alobaki: “Mpe olingi koyebisa ngai ete obálani ná semeki na yo moko. . . ?” Alobaki: “Ozali na ndingisa ya kosala yango te!” Oh, ndeko! Fiuu! Hum! Ayebisaki ye. Ya solo mpenza.

<sup>344</sup> Bótala, milimo yango esengeli kozela lisusu mwa moke, ete bato mokama na ntuku minei na minei. . . bábobama. Oh, ezali mpenza yango te, ezali mpenza te. . . ? Yango esangisi mpenza Biblia esika moko.

<sup>345</sup> Sikawa ntango na ngai esili mpenza, soki nasengeli kotika bino bóbima na ntango malamú. Kasi nazali naino na mwa makambo ya koloba, soki bokoki koyikela yango mpiko. [Losambo balobi: “Kende liboso!”—Mok.] Nayebi ete molunge ezali. Mpe nazotoka.

<sup>346</sup> Kasi, bóyoka, nazali na likambo moko ya koyebisa bino. Ezali malamú mingi na lolenge ete ezali mpenza kopela móto na motema na ngai. Nazolikya ete bobósani yango te, bomoni. Bótika náloba oyo, liboso na Ye. Na ngolu na Ye, Alakisaki ngai mpe bato na ngai, kala mingi te, ná bilamba ya mpembe. Bozali komikanisela yango lisusu? Bozali komikanisela? Bozali komikanisela lisolo yango, eleki ntango molai te? Mwasi na

libala ya Mabota, bazali kuna sikawa. Bango nyonso balátaki bilamba ya mpembe.

<sup>347</sup> Naútaki kolamuka. Naútaki na liyangani moko. Eleki pene na mobu moko, koleka mwa moke. Nalamukaki na ntongo moko, mpe nafándaki na mbeto. Nalobaki: “Chérie?” na mwasi na ngai. Aninganaki te. Bana . . . Nasengelaki kolamuka mpo na komema bango na kelasi, kaka awa, na eteyelo na bango ya kala. Ee, na—nafandaki na mbeto, boyebi, mpe nayékamaki. Boyebi ndenge ezalaka; ofandi mpe otii motó na motó ya mbeto. Tozali na mbeto moko ya lolenge ya kala. Na bongo, nayékamaki na ngai ndenge *wana*.

<sup>348</sup> Mpe namilobelaki: “Tálá, osili kokokisa mibu ntuku mitano na misato. Soki olingi kosala eloko moko mpo na Nzambe, ekozala malamumu ete obanda kosala yango, mpo okokóma momobange mingi, nsima na mwa ntango.” Bomoni.

<sup>349</sup> Mpe namilobelaki: “Oyebi, ezali solo, sikawa.” Namilobelaki: “Tala, oyebi, natikali na ntango mingi te. Nasengeli kokende kala mingi te.” Nalobaki: “Esali—esali mobu moko koleka mibu ya bomoi ya papa na ngai.” Bomoni? Namilobelaki: “Nasengeli kokende, kala mingi te. Namonaki yango. Kasi, tálá, nasali naino eloko moko te mpo na Nzambe.” Namilobelaki: “Nazalaka ntango nyonso na mposa ya kosala eloko moko mpo na Ye.” Namilobelaki: “Nasengeli kosala nokinoki mpo na kosala yango, soki nakosala yango. Kasi nayebi te ndenge nini nakosala yango, esili.”

<sup>350</sup> Namilobelaki: “Ah, nazolikia ete nakozala na bomoi mpo námóna boyei na Ye. Nalingi kokóma elima te, to molimo moko boye.”

<sup>351</sup> Bomoni, nazalaki ntango nyonso kobanga milimo. Mpe sikawa, boyebi, lolenge wana ya . . . Nazalaki ntango nyonso komilobela, ndakisa, soki nakutani na Ndeko Neville, akokóma mwa lipata moko ya mpembe, oyo ezali kotepa-tepa, boyebi. Mpe ngai nakoloba: “Mbote, Ndeko Neville.” Mpe ye akoloba: “Mbote, Ndeko Branham,” na eyokeli mosusu; akokoka koloba te. Kasi nakoyeba kaka ete ezalaki Ndeko Neville. Iyo. Nakosepela kopesa ye mbote ya loboko ndenge nasalaka ntango nyonso. Mpamba te, yango nde nyonso ngai nayebi, ezali bato. Bomoni, nakosepela kopesa ye mbote ya loboko, kasi ye akozala na loboko te. Ekozala kuna na kati ya nkunda, esili kopola. Bomoni?

<sup>352</sup> Namilobelaki: “Oh, la la, nazulikya ete nakosengela koleka na oyo wana te.” Sikawa, nazalaki . . . Sikawa nakoyebisa bino solo. Na—nazalaki kobanga kokufa; kobanga te ete nakobúnga, kasi nazalaki kolinga te kokóma molimo moko boye. Nalingi kotikala kaka moto. Nalingáki kozela Konétolama, bomoni. Nazalaki na mposa ya kotikala kaka bongo. Nazalaki kolinga

kokóma molimo moko boye te, kotelenganaka. Nazalaki wana, nazalaki kokanisa yango.

353 Mpe, na mbala moko, eloko moko esalemaki. [Ndeko Branham alelisi misapi na ye—Mok.]

354 Sikawa, boyebi, mpe bino nyonso boyebi likambo ya bimónoneli. Soki ezalaki emónoneli, natikálá komóna moko lokola wana te, bomoni. Mpe ngai nazuá yango uta bomwana na ngai.

355 Mpe, na mbala moko, eloko moko esalemaki. Mpe namiyokaki ete nazalaki kobima. Namilobelaki: “Oh-oh.” Mpe na—namilobelaki: “Na—nasili na ngai kokufa, omoni, mpe na—nasili kokende.” Bomoni?

356 Mpe nakómaki esika moko, mpe namilobelaki: “Nabanzi ete nakotala na nsima.” Ezalaki mpenza likambo ya solosolo, baninga, kaka ndenge natelemi awa. Bomoni? Mpe nabalukaki, mpo na kotala na nsima. Mpe tala ngai wana, naláli na mbeto. Mpe naminiololaki, naláláki na mopanzi ya mwasi na ngai.

357 Namilobelaki: “Ee, ntango mosusu ezalaki mpasi ya motema.” Bomoni? Namilobelaki: “Ee, omoni, nakufi na ngai mbala moko,” yango ezali mpenza lolenge malamu ya kokende. Boye, namilobelaki: “Ezali mpasi ya motema. Nasengelaki na ngai konyokwama te.” Natálaki, mpe namilobelaki: “Ee, sikawa, ezali kokamwa mpenza. Kuna, naláli, kuna kaka; mpe ngai oyo, natelemi, awa.”

358 Na bongo, nabalukaki. Ezalaki lokola elanga moko ya monene mpenza—ya monene mpenza, tóloba, to esika moko boye, elanga moko ya monene mpenza efungwámá, ya matiti ya mobesu. Mpe—mpe nalobaki: “Ee, nazali komituna oyo ezali nini?”

359 Mpe, na mbala moko, wana nazalaki kotala, bilenge basi nkóto na nkóto bazalaki koya, bango nyonso balátaki bilamba ya mpembe, suki na bango kino na loketo, makolo ngulu, mpe bazalaki koya mbangu epai na ngai. Namitunaki: “Sikawa oyo ezali nini?”

360 Nabalukaki, natalaki na *nsima*, nazalaki wana; mpe natalaki na ngámbo *oyo*, bazalaki koya. Naswáki mosapi na ngai. “Na—na—na—nalali mpongi te, ya solo mpenza.” Kasi, nazalaki komiyoka. Mpe nalobaki: “Ee, boye, eloko moko ya ndenge ékosalema awa.”

361 Mpe basi yango, bango nyonso bazalaki koya mbangu. Mpe namóná naino basi ya kitoko ya ndenge wana te! Mpe bango nyonso bazalaki koya mbangu epai na ngai. Mpe ntango bazalaki koya mbangu epai na ngai. . .

362 Boyebi ndenge nazalaka, lokola. . . Babéngaka ngai moyini ya basi, kasi ezalaka bongo te, bomoni. Kasi, na—namónaka mpenza ete mwasi ya malamau azali moko na. . . azali paúni. Kasi,

nakanisi, oyo azali malamau te azali, ndenge Salomo alobi, “mai na makila na yo.” Boye, na ntembe te, nazalaka na ntina moko te na—na basi ya bomoi mabe, to basi ya bizaleli mabe.

<sup>363</sup> Na boye basi nyonso oyo bayáki. Babandáki kozínga ngai na maboko na bango. Sikawa, ezali libanda na momesano. Boyebi ete nabóyaka mpenza likambo yango. Boye, mpe bazalaki. . . Sikawa, nakosengela koloba yango na lolenge moko mpo na—nazali na kati ya bato ya ndenge na ndenge. Kasi, bazalaki, bango bazalaki basi. Bazalaki basi. Mpe ba—bazalaki koyamba ngai, moko na moko, mpe bazalaki koloba: “Ndeko na biso ya—ya motuya!” Moko ayambaki ngai, mpe na nsima mosusu ayambaki ngai.

<sup>364</sup> Natelemaki wana, nazalaki kotala. Namilobelaki: “Ee, sikawa, oyo ezali nini?” Bomoni? Mpe bazalaki wana. Namilobelaki: “Likambo nini esalemi?” Nakitisaki lisusu miso na nsima. Nazalaki wana, nalálaki *kuna*; mpe nazalaki awa, natelemi *awa*. Namilobelaki: “Sikawa, ezali ndenge. Na—nazosósola yango te.”

<sup>365</sup> Mpe basi yango bazalaki kobélela: “Oh, ndeko na biso ya motuya,” mpe bazalaki koyamba ngai. Sikawa, bazalaki mpenza basi, na nyonso.

<sup>366</sup> Sikawa bólimbisa ngai, bandeko basi, ndenge nalobi bongo, mpo. . . Kasi boyokaka minganga na bino; mpe soki tozali na makanisi ya peto te, na bongo, tozali Baklisto te. Ata soki. . .

<sup>367</sup> Ngai nabikaka ntango nyonso bomoi ya peto. Nzambe ayebi yango. Ntango nazalaki mwana moke, Mwanje ya Nkolo ayebisaki ngai ete náyeisa nzoto na ngai mbindo te, námela makaya te, to námela masanga te. Mpe ezali solo. Na ngolu na Nzambe, natósá yango. Ntango nazaláki mosumuki, nazalaki kolanda basi te. Na bongo. . .

<sup>368</sup> Kasi mobali nyonso oyo akotika ete mwasi ákangama na nzoto na ye mobali, ye mobali asalémá na ba-cellule ya mobali, mpe ye mwasi, na ba-cellule ya mwasi, komiyoka nzoto ezalaka. Etali ngai te nani yo ozali, sikawa, koyebisa ngai te ete ezali bongo te mpo na yo, soki ozali na nzoto kólongono.

<sup>369</sup> Kasi, Kuna te; mpo bozali lisusu na ba-cellule oyo ekeseni ata moke te. Bokosala ata lisumu moko te, Kuna. Mbongwana esalemaki. Eloko mosusu ezalaki te, kaka bolingo na bandeko mpo na basi yango.

<sup>370</sup> Atako, bazalaki mpenza na bonzénga, nakanisi ete—ete mwasi, mwasi ya malamau, oyo ayebi komibatela, mpe oyo azalaka na ezaleli ya mwasi ya lokumu, azali—azali ndakisa ya paúni na mokili. Na—nalingaka nyonso oyo ezalaka kitoko. Nakanisi ete—ete mwasi oyo atikalaka na esika na ye, mpe amekaka kozala mwasi ya lokumu, a—abongi na lokumu. Nandimaka mpenza bongo. Mpe nakanisi ete mwasi oyo azali

bongo te, ezali mpenza lokola—lokola Klisto ná motemeli-na-Klisto, ndenge moko.

<sup>371</sup> Na—nalingaka nyonso oyo ezalaka ndenge Nzambe akelá yango. Ndakisa, mpunda ya kitoko, to nini, oyo etikali mpenza na lolenge na yango ya mpunda kitoko. To, eloko nyonso ya ndenge wana, ngomba kitoko, basi kitoko, mibali kitoko, nyonso oyo etikalaka ndenge Nzambe akelá yango, nasepelaka na yango mingi.

<sup>372</sup> Mpe basi oyo bazalaki ya kobonga be. Kasi ata soki bakokaki koyamba ngai na maboko na bango ndenge nini, mpe bazalaki basi, bosósoli, kasi ata lisumu moko te ekokaki kozala kuna. Ba-glande ya mibali ná ba-glande ya basi, nyonso wana ezalaki te. Matondi na Nkolo! Bazalaki bandeko na ngai ya basi, na mobimba.

<sup>373</sup> Natalaki. Mpe nabandaki ko... Na—natalaki maboko na ngai; namonaki ete bango nyonso bazalaki mpenza bilenge. Mpe natalaki; ngai mpe nazalaki elenge. Mpe ngai...

<sup>374</sup> Mpe nasilaká kolongwa suki uta nazalaki elenge mobali; mokati suki moko apakolaki yango acide phénique, mpe elongolaki ngai suki nyonso, ntango nazalaki naino elenge mpenza. Mpe ezalaka ntango nyonso, tóloba, mi—mindondo mpo na ngai, ete na—na—nabélaka miyoyo nokinoki mpenza, mpo loposo ya motó na ngai ezalaka petepete kino lelo, boyebi. Mpe misisa ya suki ezali naino wana, kasi suki eziká na acide phénique, mpe ekoki kokóla ata moke te, bomoni.

<sup>375</sup> Mpe nakendeki, mwasi na ngai nde, ntango ngai...eleki mibu ebele, mpe asombelaki ngai postiche, mwa perruque, nalátaka yango mpo na kozipa motó na ngai. Kasi nazalaki ntango nyonso koyoka nsoni mpo na koláta yango, mpo ezalaki lokola eloko ya lokuta. Kasi ngai nazalaki kolinga eloko moko te ya lokuta.

<sup>376</sup> Na bongo, namilobelaki: “Nakolata kaka ekoti ya mazopo.” Mpe yango nde nazalaki kolata, na ntango moko boye. Boyebi eloko nini basalaki? Balingaki kobenga ngai “episkopo” na ntango yango, bazalaki koloba ete nazalaki na mposa ya kozala... Bomoni? Nalobaki: “Nakolata yango lisusu te.”

<sup>377</sup> Na bongo, nayikaka mpiko na miyoyo na ngai wana, mpe na... Kasi, ngai... bino... soki maninisa efungwami, to nini, mpe mwa mopepe ekoti, ndenge wana, oh, nazuaka yango.

<sup>378</sup> Sikawa, nakendeki epai ya monganga mpe natunaki ye oyo ye azalaki kokanisa. Alobaki: “Ee, omoni, madusu ya—ya loposo na yo efungwámá, otokaka, ntango oteyaka, mopepe ekotaka wana, e—ememaka mikrobe ya miyoyo na kati ya mucus, mpe ekitaka na mongongo na yo, na ntongo oyo elandi, mongongo na yo ekaukaka, ezali yango mpenza.”

379 Na—na bongo, oh, la la, bino mibali oyo bozali na suki, boyebi te ndenge nini bosengelaki kozongisa matondi mpo na yango. Ya solo. Bomoni?

380 Ee, sikawa, nasósolaki, nsima na yango, ete na—nako. . . Moko na mikolo oyo, soki nazángi mino, nakosengela kosalisa yango, na bongo, soki te, nakotikala kaka bongo.

381 Boye, soki mobali—soki mobali. . . Ee, nandimi te ete ekozala mabe soki mobali, soki azali na mposa ya, ya kolata postiche, lokola mwasi alátaka crêpe, to crêpon, oyo bakotisaka na suki na bango ndenge wana, mpo na kovimbisa yango. Bomoni? Kasi—kasi, na ntembe te, soki osali bongo, etaleli ntina oyo ozali kosala yango. Bomoni? Etaleli ntina oyo ozali kosala yango. Na bongo. . .

382 Kasi, ata bongo, ntango nazalaki kuna, nasimbaki motó, mpe nazalaki lisusu na suki na ngai. Oh, la la! Nazongaki elenge. Mpe bango, bango nyonso, bazalaki bilenge! Mpe namilobelaki: “Ee, oyo ezali mpenza ndenge! Bango oyo.” Mpe bango nyonso bazalaki koya mbangu. . .

383 Natalaki, bazalaki koya, mpe na—namonaki Hope koya. Azalaki. . . Boyebi, akúfáki na mibu ntuku mibale na mibale. 383 Azalaki kaka kitoko ndenge azaláká. Bato mingi kati na bino babósani ye te; azalaki na miso minene ya moindo. Azalaki Allemande. Suki na ye ya moindo ekitá kino na mokongo. Namilobelaki: “Sikawa, ntango akokóma awa, akoloba—akoloba: ‘Bill.’ Nayebi ete akoloba bongo. Nayebi ete akoloba: ‘Bill,’ ntango akokóma awa.”

384 Nazalaki kotala malamumu. Mpe basi nyonso oyo bazalaki koya koyamba ngai, bazalaki koloba: “Oh, ndeko ya motuya, tozali na esengo mingi ya komona yo!” Namilobelaki. . . Bango nyonso balátaki ndenge moko, kasi suki na bango ekesanaki, boyebi, suki ya motane, suki ya moindo, mpe suki ya mosaka. Mpe—mpe bazalaki koya, kasi bango nyonso bazalaki bilenge.

385 Ntango akómaki epai na ngai, namilobelaki: “Nakotala nini akoloba.”

386 Mpe atómbolaki miso mpe atálaki ngai, alobaki: “Oh, ndeko na biso ya motuya!” Ayambáki ngai, mpe alekaki na ye. Mwasi mosusu ayaki, ayambáki ngai, nsima na ye.

387 Mpe nayókaki makelele. Mpe natalaki na ngámbo *oyo*, mpe tala ebele na mibali bazalaki koya, bilenge mibali, bango nyonso bazalaki pene na mibu ntuku mibale. Bazalaki na suki ya moindo, mpe suki ya mosaka. Mpe bango nyonso balátaki bilamba ya mpembe, makolo ngulu. Bango mpe bazalaki koya mbangu epai na ngai, mpe babandáki koyamba ngai, kobélela: “Ndeko ya motuya!”

388 Namilobelaki. Nabalukaki lisusu, mpe nazalaki wana, nazalaki kaka kolála wana. Mpe namilobelaki: “Ee, sikawa, ezali likambo ya ndenge.”

389 Mpe na mbala moko, Mongongo moko ebandaki kosolola na ngai. Nazalaki komona Mongongo yango te. Elobaki: “Oyambami, o—oyambami na bato na yo.” Na nsima mibali moko batombolaki ngai, bamatisaki ngai na likoló mpenza, likoló na eloko moko ya monene *boye*.

Nalobaki: “Mpo na nini bosáli yango?”

Balobaki: “Na mokili ozalaki mokambi.”

Mpe nalobaki: “Ee, na—nazali kosósola likambo oyo te.”

390 Mpe Mongongo yango ezalaki kosolola na ngai. Nakokaki komona Mongongo ata moke te. Sikawa, Ezalaki kaka awa likoló na ngai, Ezalaki kosolola na ngai.

391 Nalobaki: “Ee, soki na—soki nakufi, nalingi komona Yesu.” Nalobaki: “Ngai. . .Azalaki mpenza. . .Azalaki bomoi na ngai mobimba. Nalingi komona Ye.”

Na boye Alobaki: “Okoki komona Ye sikawa te. Azali naino na likoló koleka.”

392 Bomoni, ezalaki na nsé ya etumbelo, kasi, bomoni, esika ya motoba, epai bato bakendeke, bomoni; na oyo ya nsambo te, epai Nzambe azalaka, na mosanda ya nsambo. Ezalaki oyo ya motoba!

393 Mpe bango nyonso bazalaki—bazalaki wana, mpe bazalaki koleka-leka mpembeni. Mpe nalobaki. . .Ezalaki lokola bazalaki mpenza ba-milió. Namóná bango ata mokolo moko te. . . Mpe, wana nafandaki kuna, basi ná mibali yango bazalaki kokóba koya mbangu mpe koyamba ngai, kobenga ngai “ndeko.” Mpe nafandaki wana.

394 Na bongo Mongongo yango elobaki: “Oyambami na bato na yo, ndenge Yakobo ayambamaki na bato na ye.”

Nalobaki: “Bato nyonso oyo bazali bato na ngai? Bango nyonso bazali ba-Branham?”

Alobaki: “Te. Bazali bato oyo bayambaki Klisto na nzela na yo.”

395 Natám bwisaki miso. Mpe mwasi moko ya kitoko mpenza akómaki wana mbangu. Azalaki kaka lokola bamosusu. Ayambaki ngai, mpe alobaki: “Oh, ndeko na ngai ya motuya!” Atálaki ngai.

396 Namilobelaki: “Oh, la la! Azalaki lokola Mwanje.” Mpe alekaki na ye.

Mpe Mongongo yango elobaki: “Oyebaki ye lisusu te?”

Nalobaki: “Te, nayebaki ye te.”

397 Elobaki: “Okambaki ye epai ya Klisto ntango asilaki koleka mibu ntuku libwa.” Elobaki: “Oyebi mpo na nini apesi yo limemia mingi boye?”

Nalobaki: “Elenge mwasi kitoko yango asilaki koleka mibu ntuku libwa?”

398 “Iyo.” Elobaki: “Sikawa, akoki lisusu kobóngwana ata moke te.” Elobaki: “Yango wana alobi: ‘Ndeko ya motuya.’”

399 Namilobelaki: “Oh, la la! Mpe nazalaki kobanga oyo? Ee, bato oyo bazali bato ya solosolo.” Bango, bazalaki kokende epai moko te. Bazalaki kolemba te, kozala Wana.

Mpe nalobaki: “Ee, mpo na nini nakoki komona Yesu te?”

400 Elobaki: “Ee, sikawa, mokolo moko, Ako—Akoya. Mpe Akoya liboso epai na yo, na nsima okosámbisama.” Elobaki: “Bato oyo bazali baoyo babongolaki mitema na nzela na yo, baoyo yo okambaki.”

401 Mpe nalobaki: “Olingi koloba, lokola nazali mokambi, nde nako . . . ete Akosambisa ngai?”

Elobaki: “Iyo.”

402 Mpe nalobaki: “Mokambi nyonso nde asengeli kosambisama ndenge wana?”

Elobaki: “Iyo.”

Nalobaki: “Bongo Polo?”

Alobaki: “Asengeli kosambisama ná bato na ye.”

403 “Ee,” nalobaki, “soki etónge na ye ekóti, oyo ya ngai mpe ekokóta, mpo natei mpenza Liloba yango moko.” Ezali bongo. Nalobaki: “Epai ye abátisaki na Nkombo na Yesu, ngai mpe nasalaki bongo. Nateyaki . . .”

404 Mpe ba-milió yango bagángáki, bango nyonso na mbala moko, balobaki: “Tozopema likoló na Yango!”

405 Mpe namilobelaki: “Oh, la la! Soki náyebaka yango liboso náya awa, nalingaki kondimisa bato báya awa. Basengeli kozanga likambo oyo ata moke te. Ee, tálá awa!” Na bongo . . .

406 Mpe Alobaki: “Sikawa, mokolo moko Akoya, nsima na yango . . . Sikawa, awa, toliaka te, tomelaka te, to tolálaka te. Bisu nyonso tozali bobele moko.”

407 Ee, ebongi be te; eleki kobonga be. Ezali kitoko te; ezali koleka kitoko. Nkombo moko te ekoki . . . Okoki kokanisa te . . . Maloba ezangi na buku mpo na koloba yango. Okómi kaka, esili.

408 Mpe namilobelaki: “Ee, oyo, oyo ekozala malamau be. Bongo nsima na yango tokosala nini?”

409 Alobaki: “Na nsima, ntango Yesu akoya, mpe bisu to . . . mpe Akosambisa yo, to mpo na lotomo na yo, nsima na yango tokozonga na mabelé, mpe tokoláta banzoto.” Ee, na—natikálá kokanisa na ntina na yango te na ntango wana. Elóngobani

mpenza na Makomi. Alobaki: “Bongo tokozóngá na mabelé mpe tokoláta banzoto, na ntango yango nde tokolia. Awa toliaka te, tolálaka mpe te.” Alobaki: “Kuna toliáka, kasi tokozóngá na mabelé.”

<sup>410</sup> Namilobelaki: “Oh, la la, ezali mpenza kitoko mingi! Oh, la la! Mpe nazalaki kobanga yango. Mpo na nini nazalaki kobanga kokufa, mpo na koya na esika ya boye? Ee, oyo nde kobonga be, bakisa kobonga be, bakisa kobonga be. Oh, oyo ezali kitoko mingi!”

<sup>411</sup> Bomoni, tozalaki mpenza na nsé ya etumbelo. Bomoni? Ezalaki mpenza yango, bomoni, na nsé ya etumbelo mpenza, tozalaki kozela Boyei, bomoni, mpo Ákende kozua baoyo bazalaki kolala na . . .ba—banzoto oyo ezali kolala na putulu, mpo na kosékwise biso; Akoya kosékwise biso.

<sup>412</sup> Ndenge Yesu alekaki na paradizo, mpe asékwisaki Abraham, Isaka, ná bango nyonso, boyebi, baoyo bazalaki kozela lisekwa ya liboso. Bakótaki na engumba mpe bamónanaki na bato mingi.

<sup>413</sup> Elóngobani mpenza be na Biblia. Emononeli yango mpe, to ata ezalaki nini, elóngobanaki mpenza na Makomi.

<sup>414</sup> Mpe nalobaki: “Ee, ezali mpenza kitoko mingi!” Na bongo namilobelaki: “Ezali mpenza kitoko ming- . . .?”

<sup>415</sup> Nayokaki elobeli moko ya kitoko, lokola ya mpunda. Natalaki. Ezalaki mwa mpunda na ngai, oyo nazaláká komata, Prince moke, nazalaki kolinga ye mingi. Azalaki wana, atelemaki pembeni na ngai, mpe atiaki motó likoló na lipeka na ngai, mpo na koyamba ngai. Lokola ntango nazaláká kopesa ye sukali, boyebi, mpe atiaki . . .Nayambaki ye. Nalobaki: “Prince, nayebacki ete okozala awa.”

Nayokaki eloko moko kolémbola loboko na ngai. Ezalaki mbwa na ngai ya bokila.

<sup>416</sup> Ntango—ntango M. Short, ya awa, apesaki ye mbondo, nakátaki ndái ete nakoboma M. Short mpo na yango. Nazalaki na mibu pene na zomi na motoba. Apesaki ye mbondo, apesaki ye mosuni batiá mbondo. Mpe papa na ngai akangáki ngai ná bondóki, nazalaki kokende kuna mpo nábeta ye masási, na kati ya lopango ya police. Nalobaki: “Nakoboma ye.” Nalobaki: “Ee. . .” Nakendeiki na nkunda ya bambwa. Na—nakundaki ye. Nalobaki: “Fritz, ozalaki lokola moninga mpo na ngai. Olátisaki ngai bilamba mpe osungaki ngai nakende eteyelo. Ntango olingaki kokóma mobange, ngai nde nalingaki kotala makambo na yo. Sikawa babomi yo.” Nalobaki: “Nalaki yo, Fritz, ete ye akotikala na bomoi te.” Nalobaki: “Nalaki yo ete akotikala na bomoi te. Mokolo moko, nakokanga ye na balabala, azotambola, na bongo, nakoniata ye na motuka, omoni.” Mpe nalobaki: “Nakozongisela ye mabe mpo na yo.”

417 Kasi boyebi? Ngai moto nakambaki moto yango epai ya Klisto, nabátisaki ye na Nkombo na Yesu, mpe nakundaki ye na liwa na ye. Iyo, misie. Nabóngolaki motema pene na mibu mibale nsima na yango. Nakómaki komona makambo ndenge mosusu, na ntango yango, bomoni. Nalingaki ye na esika ya koyina ye.

418 Boye, na ntango wana, ata bongo, Fritz azalaki wana, azalaki kolembola ngai loboko. Mpe nazalaki . . . Nazalaki kotala.

419 Nakokaki kolela te. Moto moko akokaki kolela te. Kaka esengo nde ezalaki kuna. Okokaki kozala na mawa te, mpo kaka esengo nde ezalaki kuna. Okokaki kokufa te, mpo Bomoi nde ezalaki kuna. Bomoni? Bomoni? Okokaki kokóma mobange te, mpo kaka bolenge nde ezalaki kuna. Mpe yango nde . . . Ezali mpenza kobonga be. Namilobelaki: “Oh, ezali mpenza kitoko mingi!” Mpe ba-milió . . . Oh, la la! Nazalaki mpenza komiyoka malamú, bomoni.

420 Mpe—mpe na mbala moko, nayókaki Mongongo moko. Egángáki, Elobaki: “Nyonso oyo osíláká kolinga . . .” lifuti ya mosala na ngai. Nazali na ntina moko te ya lifuti. Alobaki: “Nyonso oyo osíláká kolinga, mpe nyonso oyo esíláká kolinga yo, Nzambe apesi yo yango.”

Nalobaki: “Nkembo na Nkolo!”

421 Namiyokaki ndenge. Namilobelaki: “Likambo yango nini? Namiyoki ndenge.” Nabalukaki mpe natalaki. Mpe na mbeto, nzoto na ngai ezalaki koningana. Nalobaki: “Oh, nazali na ntina ya kozonga te, ya solo mpenza. Te, kotika te ete nákende.”

422 Kasi Nsango—malamu esengelaki koteyama. Na mpwasa, nazongaki na mbeto, bomoni, ndenge wana.

423 Eleki pene na sanza mibale te . . . Boyokaki yango, botángaki yango, na—na zulunale ya *Mongongo* ya Bato na Mombongo. Esili kotámbola na mokili mobimba, bomoni. Mpe Ndeko Norman, awa, nabanzi ete azali awa esika moko na mpokwa oyo. Akomaki yango, mpe atindaki yango na lolenge ya nkasa. Esili kokende bipai nyonso. Mpe batei bakomelaki ngai mikanda, ebele na bango, mpe balobaki . . .

424 Moko ezali awa, nakolobela kaka yango. Na ntembe te, ezalaki nkama na nkama. Oyo wana elobaki ete: “Ndeko Branham, emononeli na yo, na *Mongongo* ya Bato na Mombongo . . .”

425 Mpe nasepelaka na Tommy Nickels mingi, ata azali lisusu elongo ná Bato na Mombongo te. Nayebi te mpo na nini, kasi azalaka lisusu na bango te. Kasi akomaki yango malamú mpenza, makambo oyo nalobaki kuna. Na kati ya zulunale ya ba-trinitaire wana, alobaki: “Epai ngai . . . Epai Polo abátisaki na Nkombo na Yesu, mpe apesaki motindo ete bato básala ndenge moko, ngai nasali ndenge moko.” Bomoni, atiaki yango mpenza

ndenge ezalaki. Bomoni? Na bongo na—na—namilobelaki: “Oh, la la!”

426 Motei yango akomelaki ngai, alobaki: “Ndeko Branham, emononeli na yo. . .”

427 Kútu, ekokaki kozala emononeli. Alobaki. . . Sikawa, ngai nalingi te kobenga yango, “komemama.” Soki Polo. . . Soki ngai namemamaki kino na lóla ya liboso mpe namonaki makambo yango, bongo boni mpo na Polo, oyo amemamaki kino na lóla ya misato? Ezalaki eloko nini? Alobaki ete akokaki ata kolobela yango te, bomoni, soki amemamaki kuna. Soki ezalaki komemama, nayebi te. Nakoki koloba te. Nayebi na ngai mpenza te.

428 Kasi motei yango alobaki: “Ndeko Branham, emononeli na yo elóngobanaki mpenza na Makomi, mpe ezalaki malamú, kasi ebébaki ntango olobaki ete mpunda na yo ezalaki kuna.” Alobaki: “Mpunda na Lóla?” Alobaki. . . Sikawa bomoni moto wana ya mangomba, bwanya, makanisi? Bomoni? Alobaki: “Lóla esalemaki mpo na bato, mpo na bampunda te.”

429 Ee, nafandaki na ngai. Billy, mwana na ngai, asilaki kotia mokanda yango na biró na ngai ya kala ya losambo, eleki pene na sanza misato to minei.

430 Nalobaki: “Ndeko na ngai ya motuya, nakámwe na bwanya na yo, kasi, ná boyebi na yo ya Makomi. Nalobaki te ete nazalaki na Lóla. Nalobaki ete esalemaki na esika moko lokola paradizo, mpo Klisto azalaki naino likoló na yango, bomoni. Kasi,” nalobaki, “soki ekoki kosilisa mposa na yo, zua Emoniseli 19. Mpe ntango Yesu akouta na lola na Likoló, Akozala likoló na mpunda ya mpembe, mpe basantu nyonso elongo na Ye bakozala likoló na bampunda.” Ya solo. Na ntembe te. Iyo, ya solo mpenza.

431 Mpe kuna na Esika moko wana, ezalaki na moko ezalaki lokola mpongo, moko lokola ngombe, mpe moko. . . Ee, oh, la la, bampunda oyo eyaki kozua Eliya ezali wapi? Bomoni, elakisi kaka ete likanisi ya moto elukaka kaka eloko ya mabe. Ya solo.

432 Sikawa bótala. Kasi nazalaki kokanisa, lokola Yoane, ndeko ya motuya, mosantu oyo. . . Nakanisaki ete ekozala ntango oyo esengeli mpo nálobela likambo yango, liboso ya kosilisa, bomoni. Soki Yoane atalaki Kuna, mpe baoyo wana bazalaki bandeko na ye, bomoni, bandeko na ye oyo basengelaki kozela lisusu mwa moke; ndenge moko mpe, bomoni, Nkolo Nzambe apesaki ngai nzela ya komona bandeko na ngai ná basantu oyo bazali kozela Boyei na Nkolo. Bótala, bazalaki na nsé ya etumbelo ya mbeka te; baoyo ya ngai bazalaki kuna te. Kasi, baoyo bazalaki, babomamáká. Bomoni? Baoyo ya ngai bazalaki te na nsé ya etumbelo ya baoyo babomámá.

433 Sikawa nalingi bóyoka na bokebi mpenza. Mpe nakosilisa, na bosembo mpenza, pene na miniti zomi, na ngonga ya zomi, soki nasengeli kokata yango mpo na kosilisa yango lobi.

<sup>434</sup> Bótala. Bango, bazalaki te oyo ya ngai...baoyo Nkolo alakisaki ngai, Mwasi na libala, Azalaki na nsé ya etumbelo ya baoyo babomámá te, te, etumbelo ya mbeka ya baoyo babomámá te; kasi bazuaki bilamba ya mpembe, mpo bayambáki ngolu oyo elimbisaka ya Liloba ya bomoi. Klisto apesaki bango bilamba ya mpembe. Nakanisi te ete bofungwami... .

<sup>435</sup> To, kutu, nakanisi ete na bofungwami ya Elembo ya Mitano oyo, ndenge nandimi, ete Efungwameli biso. Nasali yango na lisósoli malamú, ná emoniseli ya polele liboso na Nzambe. Ezali koluka kotalisa makanisi na ngai te, mpo nazaláká ntango nyonso kotelemela bibongiseli, nazaláká kolinga ata moke te kozala moko na bango. Kasi mpo na ngai, Esili kofungwama sikawa.

<sup>436</sup> Nakanisi mpe, likambo mosusu. Na bofungwami ya Elembo ya Mitano oyo, na ntango oyo, esemboli mateyo moko awa, oyo nakoki kolobela, ya elimo oyo elali mpongi. Sikawa, nayebi ete ezali na bato awa, oyo bandimaka yango, bomoni, na elimo oyo elali mpongi. Nakanisi ete Oyo etalisi polele ete ezali bongo te. Balali mpongi te. Bazali na bomoi. Banzoto na bango nde elali mpongi. Kasi, elimo ezali na kati ya nkunda te, bazali liboso na Bozali na Nzambe, bomoni, na nsé ya etumbelo.

<sup>437</sup> Na likambo yango nde nayókanaka te ná ndeko moko ya motuya, azali molakisi. Mpe, nazali komona, nayebi ete bato na ye mosusu bafandi awa. Mpe nasosoli ete azali molakisi monene. Azali molakisi, mo—Molakisi ya Bonzambe, mpe na Doctorat ya Philosophie, Doctorat na Droit. Azali—azali mpe moto malamú. Nakanisi ete asíli kokende, na ntango oyo. Kasi azalaki moto malamú, mpe mokomi malamú. Ezali Ndeko Uriah Smith, oyo akomaki buku ya *Daniele ná Bimoniseli*. Sikawa, mpo na bino baoyo bolandaka malakisi na ye, bomoni, sikawa ngai... Ezali te ete ngai... nalingi koloba yango na lolendo te, kasi ngai... Bomoni?

<sup>438</sup> Kasi, Ndeko Smith, na kolukáká kondimisa, bomoni, mpe kolukáká kondimisa bato ete elimo elálaka mpongi, alobaka ete “elimo elalaka mpongi. Mpe na Likoló, etumbelo ya mbeka ezalaka te. Ete, etumbelo bobele moko oyo balobeli, ezali,” yango nde ye a—andimaka, oyo ezali na Likoló, “ezali etumbelo ya mpaka malasi.” Kasi, bino balingami na ngai... Mpe nazali koluka kotelemela ndeko na ngai te. Nako... nakolikia kokokutana na ye na ngámbo mosusu, bomoni. Nazoluka kotelemela molakisi monene wana te.

<sup>439</sup> Kasi ezali kaka mpo na kotalisa ete Oyo etalisi polele ete ezali yango te, bomoni. Etalisi polele ete ezali yango te. Bofungwami ya Elembo oyo, na mokolo ya nsuka oyo, elongoli mpenza likambo ya elimo kolala mpongi. Bomoni? Bazali na bomoi. Bakufá te. Bomoni? Bótala.

440 Bótala likambo oyo sikawa. Sikawa, soki na Likoló etumbelo ya mbeka ezali te, Mbeka mpo na lisumu, Mwana-mpate, ezali wapi kasi? Esengeli kozala na esika moko epai Mwana-mpate wana abomámá, ya kotanga Makila, azali, esika Makila... yango.

441 Sikawa, mpaka-na-malasi ezalaki biloko ya nsolo, nsolo kitoko, oyo bazaláká kotumba, oyo Biblia elobaki ete ezalaki “mabondeli ya basantu.” Soki likoló na etumbelo mbeka ezali te, boye, mabondeli ekoki koyambama te. Kaka na nzela na Makila oyo ezali likoló na etumbelo ya mbeka nde mabondeli ekoki komata kino epai ya Nzambe.

442 Ndeko Smith azalaki na libunga, bomoni. Ezali te mpo na kotelemela ye; nakanisi ete natalisaki yango mpenza polele, na boling na bandeko mpe na limemia mpo mosala na ye monene, bomoni. Kasi azalaki na libunga.

443 Elembo ya Mitano efungoli yango, bomoni, bomoni; efungoli makambo mosusu mingi, soki bosósoli yango. Bomoni? Nazozela mituna na ngai, bomoni, soki ngai... Malamu.

444 Sikawa, sanduku ezalaki wapi; Mwana-mpate oyo azalaki kotanga makila, oyo abomamaki, azokisamaki, atangaki makila mpo na kolongola masumu, mpo na mabondeli ya nsolo kitoko wana?

445 Bótala, Biblia elobi: “Soki mongombo ya mokili oyo, oyo tofandi kati na yango ebebi, tozali na mosusu oyo ezali kozela.” Kuna nde epai namonaki basantu yango. Bomoni?

446 Bótala malamu ntango bebé... Bólimbisa ngai lisusu, bandeko basi, mpo na elobeli ya polele liboso na bilenge basi. Kasi, bótala. Soki mama akumbi zemi, mwa liboke ya misisa wana eminiolusaka mpe eninganaka, bozali kososola, ezali nzoto ya mokili oyo. Mpe kaka ndenge nzoto ya mokili oyo esalemaka na mokili oyo... .

447 Osílá kotala mwasi na yo liboso bana mike bábotama? Pene na nsuka, mwasi akómaka ntango nyonso na bobóto ná bopolo mingi. Ata azalaka bongo te bomoi na ye mobimba, akokóma bongo na ntango yango. Bosílá komona zebe ya bosantu, to ya bopolo, oyo bamama bazalaka na yango?

448 Bongo, komona mosumuki moko kuna, oyo azali kotiola mama oyo azali na—na zemi. Namonaka ete ezali bolema. Bomoi moko ezali koya na mokili.

449 Kasi bomóná komiyoka ya bopolo oyo ezalaka zinga-zinga na mama? Ezali nini? Ezali mwa nzoto moko ya molimo, bomoi ya molimo, oyo ezali kozela mpo na kokóta na mwa nzoto yango, kaka ntango ekobótama. Sikawa, abimi kaka; kasi, soki abotami, abotami. Nzoto ya molimo ekosangana ná nzoto ya mokili.

450 Na bongo, Biblia eteyi ete sikawa, biso tobótami na Nzambe. Tosili kobótama na Molimo Mosanto, ete kati na biso Klisto

azali, mwana na Nzambe oyo azali kosalema na kati na biso. Mpe ntango nzoto ya mokili oyo ekobeba, nzoto ya molimo yango ekouta na kati ya mabelé, ekozala na nzoto mosusu oyo ezali kozela mpo na koyamba yango. “Soki mongombo ya mokili oyo ekwei, nzoto mosusu ezali, mpo na koyamba yango.” Nzoto ya kufa oyo ekoláta kozanga kokufa. Oyo ya mabelé ekolata oyo ya likoló. Bomoni nini nalingi koloba? Nzoto ya mokili ezali, oyo ya masumu; kasi nzoto mosusu ezali, oyo ekokani na yango, oyo ezali mpenza lokola yango, tokendeke epai na yango.

<sup>451</sup> Mpe nazongisi matondi mingi na Nzambe ete nakoki koloba, lokola mokengeli mpe ndeko na bino, ete namonaki bato yango, ya solo mpenza, na nzoto yango, mpe nasimbaki bango na maboko na ngai. Ezali solo. Bótala.

<sup>452</sup> Bótala malamumu. Bótala Mose, Eliya. Nsima na Mose kokufa, mpe Eliya komemama na Likoló, azalaki awa, na Ngomba ya Mbongwana, ná biyokeli na ye ya koloba, koyoka, kosósola, mpe kosolola ná Yesu, liboso bábaka Ye na ekulusu. Sikawa, azalaki na nzoto ya ndenge nini?

<sup>453</sup> Bótala Samwele, pene na mibu mibale nsima na ye kokufa. Mwasi na soloka na Ene-Dore abengaki ye mpe azongaki na—na libulu na butu wana, mpe asololaki mpenza ná Saulo; ayokaki Saulo, ayanolaki ye, mpe asakolaki mpo na ye makambo oyo esengelaki kosalema. ata bongo, molimo na ye ebongwanaki te. Azalaki mosakoli.

<sup>454</sup> Ntango molimo ya Eliya ekoya likoló na moto yango, ekosalisa ye makambo lokola Eliya mpenza. Akokende na lisobe. Akolinga lisobe. Akoyina basi ya bomoi mabe. Akotelemela bibongiseli. Akotia mayi na monoko te mpo na moto moko. Mpe ezali kaka . . . Ezali, ekozala molimo na ye. Ezalaki bongo, mbala nyonso oyo eyaki, bomoni.

Mose akozala mpenza Mose yango moko.

Sikawa, tomoni mpe likambo yango moko, na Emoniseli 22:8.

<sup>455</sup> Sikawa, to mpo na kosukisa likambo yango, mpo na baoyo . . . Milimo (sikawa bótala yango malamumu) oyo ezalaki na nsé ya etumbelo, ntango Elembo oyo ebukamaki, baoyo babomamáka katikati na liwa ya Klisto mpe konétolama ya Lingomba; etonga ya Eichmann, ná nyonso wana, Bayuda oyo ya solo, oyo bankombo na bango ekomamaki na Buku. Soki otali malamumu, ndeko na ngai, kokokana na Makomi, bazalaki kosolola, kogánga, koloba, koyoka, mpe bazalaki na biyokeli nyonso mitano. Balalaki na nkunda te, kozanga lisosoli. Bazalaki mpenza ya kolamuka, mpe bazalaki kosolola, koloba, koyoka, mpe nyonso wana. Ya solo? Oh, sunga biso!

<sup>456</sup> Miníti mibale. Amen. Ngai . . . bolimbisa ngai ndenge naúmisi bino ndambo ya ngonga. Te, nakoki te, nasengelaki koloba bongo te, bomoni. Bomoni? Ya solo, bomoni.

457 Kasi, bótala, oyo ezali mpenza kokokana na lisosoli na ngai mobimba. Mpe kokokana na emoniseli oyo Nkolo Yesu Klisto apesaki ngai na ntongo oyo, kaka liboso ntongo étana, Elembo ya Mitano yango wana efungwami, mpo na kotambola elongo ná Bilembo minei ya liboso. Na ngolu na Ye, Apesaki ngai yango, ngolu na Ye mpo na bino ná ngai. Totondi Ye mpo na Yango. Mpe, na lisungi na Ye, mposa na ngai ezali ete nábika bomoi ya npembeni koleka . . . na oyo nakoki kobika, koteyáká bato kosala ndenge moko, kino mokolo nakokutana ná Ye, elongo ná bino, na Nkembo, ntango makambo nyonso ekosila. Nalingi Ye mpo na oyo, mpe ezali mpenza kokokana na boyebi na ngai mpo na Yango.

458 Mpe nandimi mpenza, na motema na ngai mobimba, ete bimoniseli ya solo, bimoniseli ya Liboso, ya Mibale, ya Misato, ya Minei, mpe ya Mitano, esili sikawa kofungwamela biso.

Nalingi Ye, nalingi Ye  
Mpo Alingaki ngai liboso

...?...

Likoló na Ekulusu.

[Ndeko Branham abandi koyemba na nsé ya mongongo *Nalingi Ye*—Mok.]

459 Sikawa, na kimia mpe na limemia liboso na Nzambe! Wana tomoni Elembo oyo kofungwamela biso, Nzambe asengelaki kozua bana na Ye moko ya bolingo mpe koboma bango miso, mpe kolekisa bango wana, mpo boyengebene—boyengebene na Ye Moko esengaka ete lisumu ésambisama. Bókanisa naino. Boyengebene na Ye, mpe bosantu na Ye eséngaka boyengebene. Mobeko oyo ezángá etumbu ezali mobeko te. Mpe mibeko na Ye Moko, Ye moko, Akoki te kotelemela yango mpe kotikala kaka Nzambe.

460 Yango wana Nzambe asengeláká kokóma moto. Akokaki kozua eloko mosusu te, mwana oyo azali te . . .mwana lokola bana na Ye nyonso, to eloko moko ya ndenge wana. Nzambe akómaki nyonso mibale, Yesu akómaki mbala moko Mwana mpe Nzambe, nzela bobele moko oyo Akokaki kosala yango na ndenge esengeli. Nzambe asengelaki kozua etumbu yango, Ye moko. Elingaki kozala sémbó te, ete Ápesa etumbu yango na moto mosusu, moto mosusu. Boye, Moto mpenza ya Yesu, azalaki Nzambe oyo atalisami na nzoto, abengami Emanuele.

461 Mpo na kosala yango, mpo na kozua Mwasi na libala, mpe kobikisa etonga moko ya bapakano oyo babungá, ya Mabota, Asengelaki koboma bana na Ye Moko miso. Na nsima, kopesa bango etumbu mpo na yango, na nzoto, mpo baboyaki Ye. Kasi ngolu na Ye ebongisaki bilamba. Kasi, Bomoi, bomoni likambo oyo esalemaki.

462 Mpe soki Asengelaki kosala yango mpo biso tózua libaku, ndenge nini tokoki kotiola libaku ya bolingo yango? Soki moto moko azali awa, na mpokwa oyo, elenge to mokólo, oyo, kino sikawa, azalaki kotiola libaku yango, oyo Nzambe afútaki ntalo monene wana, mpe okolinga koyamba libaku wana Nzambe azali kopesa yo na mpokwa oyo; ete ozali na ntina te, na boyebi na biso mpenza, ya kobomama, atako okoki na yo. Kasi elamba ya mpenbe esili kobongisama mpo na yo. Mpe soki Nzambe azali kobeta na ekuke ya motema na yo sikawa, mpo na nini óyamba yango te! [Ndeko Branham abeti likoló na eteyeló—Mok.]

Sikawa tógumba lisusu mitó.

463 Soki moto yango, to bato yango bazali awa, oyo bazali na mposa na yango, to oyo balingi koyamba yango na moboko ya kondima na bino na Makila oyo esopanaki, oyo Nzambe asengelaki kosopa mpo na bino, ayokaki mpasi koleka bato mosusu nyonso ya kufa. Moto moko te akokaki koyoka mpasi ndenge wana. Mpasi na Ye moko ezalaki makasi mingi na lolenge ete mai na Ye ná Makila na Ye ekabwanaki na kati ya misisa na Ye. Liboso Ákóma na Kalvari, matangá ya Makila ezalaki kobima na nzoto na Ye, mpasi na Ye elekaki makasi, mpe motema na Ye etútamaki mingi mpo na oyo Asengelaki kosala. Kasi, Akokaki mpe koboya kosala yango. Kasi, na motema malamú, Asalaki yango mpo na yo ná ngai. Okoki mpenza koboya bolingo ya boye, oyo moko te ekokani na yango?

464 Mpe bomoni yango sikawa, na bofungwami ya Bilembo oyo; ete makambo oyo bino bosáláka, ná oyo Nzambe asilá kosálá mpo na bino. Mpe obelemi mpo na kopesa bomoi na yo epai na Nzambe, soki Akosengela kopikola yo na maboko ya motemeli-na-Klisto, oyo bozali kati na yango sikawa, okolinga koyamba oyo Azali kopesa yo, na kotomboláká kaka loboko epai na Ye, koloba: “E Nzambe, na kosala oyo, nalingi kotalisa ete nayambi ngolu oyo opesi ngai”?

465 “Mpe, Ndeko Branham, nazali na mposa ya mabondeli na yo, ete nakotikala mpenza sembo.”

466 Tómbola loboko, mpe nakobondela. Nzambe ápambola yo. Nzambe ápambola yo. Euta na motema mpenza. Ko—kotómbola loboko te, soki euti na motema te. Mpe kaka na esika ofandi, yamba yango kaka wana. Mpamba te, kobosana te, okokaki kotombola loboko te, soki Eloko moko elobaki na yo te ete ósala yango. Mpe eloko mosusu ekokaki kosala yango te, soki Nzambe te.

467 Boye, sikawa, wana ozali komona Makomi kofungwama na kobonga be boye! Bomoni oyo ezali kosalema, na kati ya bileko, na mwa mibu oyo eleki, na mibu ntuku mibale to ntuku misato oyo. Bomoni yango kokokisama na kobonga be. Bomoni ndenge Makomi kolobela mpenza makambo oyo esalémá, ná oyo elingi kosalema. Na bongo, na mobóko ya kondima na yo na mosala

ya Klisto, na esika ofandi sikawa, mpe otomboli maboko, loba: “Kobanda na miníti oyo, likambo esili. Nayambi Klisto sikawa lokola Mobikisi na ngai. Mpe nakobika mpo na Ye, na bomoi na ngai oyo etikali. Mpe mposa na ngai ezali ete Nzambe átondisa ngai na Molimo Mosanto.” Mpe soki obatisami naino na Nkombo na Yesu Klisto te, mai ya libatisi ezali kozela yo.

Tóbondela.

468 Nkolo Nzambe, ezali na na motango monene ya maboko katikati na bato, oyo etombwami. Nandimisami mpenza ete Ozali mpenza Nkolo Yesu moko oyo alongolaki masumu na biso, eleki mibu ebele. Mpe, na komonáká Bilembo yango komonisama, mpe makambo minene oyo esalemi kaka awa na mwa mibu oyo eleki, nandimi na motema mobimba ete ekuke ya mawa ebandi kokangama, mpe Obelemi sikawa mpo na kosala mobembo na Yo mpo na kosikola bato na Yo. Wana esika ezali naino, mpe ekuke ezali naino ya kofungwama, lokola na mikolo ya Noa, tika ete milimo ya motuya oyo, baoyo bafandi na nzoto, na mongombo oyo ekobeba mokolo moko, baoyo batómboli loboko ya kufa wana, uta na kati na bango; mpo na kondimisama na—na bango mpe litatoli na bango, ete bandimi mpe balingi koyamba oyo Ozali kopesa bango, mpo na lobiko, ná Buku oyo ya polele ekangami na elembo, oyo esili kofungwama mpo na biso. Pesa bango, na mpokwa oyo, Nkolo, elamba ya boyengebene ya Yesu Klisto, mpe látisa milimo na bango na yango, ete bákoka kotelema liboso na Yo na Mokolo yango, oyo ekómi mpenza pene, ya kobonga be, na nzela ya Makila ya Klisto.

469 Nkolo Nzambe, soki babátisami naino te na Nkombo na Yesu Klisto! Mpe kokokana na emoniseli oyo Opesi ngai mpo na yango; mpe komona ete Polo apesaki motindo na baoyo Yoane Mobatisi asiláká kobatisa, ete bábatisama lisusu na Nkombo na Yesu Klisto, mpo báyamba Molimo Mosanto, na Misala 19. Nasengi, Nkolo, ete Óndimisa bango na Solo, mpe tika ete bátosa Yo.

470 Na nsima, na botosi ya koyambama na bango mpe na botosi ya koyambola na bango, kino na mai; na ngala na Yo, tóndisa bango na Molimo Mosanto, mpo bázua nguya ya mosala, mpo na bomoi na bango oyo etikali. Natiki bango sikawa na maboko na Yo, na Nkombo ya Mwana-mpate ya Nzambe oyo apesamaki mbeka, Yesu Klisto. Amen. Amen.

Nalingi Ye, nalingi Ye  
Mpo Alingaki ngai liboso  
Mpe Asombi lobiko na ngai  
Likoló na Ekulusu.

471 Sikawa, bino baoyo botómbolaki maboko: Bótosa mitindo ya Molimo, oyo ekolóngobana na—na mibeko likonzi ya Liloba, mpo na mosumuki oyo abongoli motema. Bótosa yango, na makambo


nyonso. Mpe tika ete Nzambe ya Lola áfuta bino mpo bozui ngámbo na Ye. Nkolo ápambola bino.

<sup>472</sup> Lobi na mpokwa, bóya na bikomeli mpe nkasa na bino, sikawa, ndenge bosalaka. Tolingi kozala awa kaka na ntango yango moko, na ngonga ya nsambo na ndambo, mpenza, soki Nkolo alingi. Mpe na . . . bóbondela mpo na ngai, mpo Nzambe áfungolela ngai Elembo ya Motoba, lobi, ete názala na makoki ya koteya bino Yango ndenge Akopesa ngai Yango. Liboso na ntango yango, tóyemba lisusu. Kaka banzembo te, kasi masanzoli mpo na Ye oyo akufelaki biso mpe asikolaki biso. *Nalingi Ye.*

Na . . .

Mokengeli na bino ye oyo sikawa.

. . .lingi Ye, nalingi Ye

Mpo Alingaki ngai liboso. 

63-0322 Elembo Ya Mitano  
Branham Tabernacle  
Jeffersonville, Indiana U.S.A.

LINGALA

©2026 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamú ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)